

Irokhase Ni iJoni o keke

Ikhueghie ungmehi-a

¹ Ebe ona a keke imekeguele oyi iJesu iKirisiti shi ni Eshinegba o ro nali ni e khi emini a ya me ni ode o a ke nue, ni o rote obo oyi ageni rokhase iJoni oni o o ga oyoli.

² IJoni o pfi otsele shi emhi nya ni o me ni o khi ungmehi oyi Eshinegba ali otsele oyi iJesu iKirisiti.

³ Ikhivose o khi na ogbo ni o ya ze ingmemhi eyi imeguele ena, ikhivose o li ya khi na ogbo ni o suo we, ali oni o ri emini a keke shi o gbe akanya, irari khi oni eghenge ni a ro ya me eni emhi enana nya o she ti bhale.

⁴ IJoni o ri otse ghi igbaa nya eyi eni e mie iJesu iKirisiti suo ishilua ni e la eke Esha.

Okhale ali opfomhe o ka khi oye rote obo oyoli, Oni o khi loli, ni o kie kpe khi loli, ni o kie gbo ya bhale. Iyemhe ishilua ni e migha odalo ukpekhomhi oyoli e li e tse e.*

⁵ Li shi iJesu iKirisiti ni o khi otsele ona igesikia, oni o te odode mu eghuli o le, ni o mhese na ighie na agbo, o li ri otse ghi e.†

Loli ni o nono ingme oyawa, ni o ri o lia eyoli rue awa olamhe eyawa le,

⁶ o she ri awa khi ighie ali ekpodalo-ugamhi eyi Eshinegba ni e ke ga Eshinegba oyoli ali itali. Ufumhi

* **1:4** Li ze Okiali 3.14; Iro 4.5 † **1:5** Li ze Aza 55.4; Iwolo 89.27

ali ekpabọ e khi eyọli agbọagbọ ya je agbọagbọ!
Atse.‡

7 A ghe i, o ya la
elemhi otughunu
ke bhale,
ukpelo e nya e ya me ọli,
ghe egbọ ni e sọno li iwere.
Egbọ nya na eke agbọ
e ya vie oya irari oyọli.
Igho o ya li! Atse.§

8 “Mhemhe mhi khi Aafa ali Omega.” Eshinẹgba
Onomhuẹ Nofunẹ nya o ngme gho, Oni o khi loli, ni
o kie kpe khi loli, ali ni o ya bhale.*

Oni o li abi Omi ogbo

9 Mhemhe iJoni ni mhi khi inyoghuo e ni awa ga
me osoli, ni awa ga mhọli obo shi omhesẹ ali ni
awa kuegbe-a regbemie itobo iJesu. Abi mhi ro la
eke ni i la iteva oke oniemi ni a lu iPatimosi irari
ungmemhi oyi Eshinẹgba ali otsẹle oyi iJesu.

10 Ayemhe o tiemhile shi mhe o ogbele oyi
Onomhuẹ, mhi suo uruli na leghe nabi akala
ukhokho oyemhe.

11 Oni uruli oo, “Keke emini u me shi ebe, ni u
rue ọli ghi igbaa nya eyi eni e mie iJesu iKirisiti
suo ishilua eni e la eoli Efesosi, ali iSimirina ali
iPagamu ali iTiatira ali iSadisi ali iFiladefia ali
iLaodisha.”

‡ 1:6 Li ze Okiali 19.6; Iro 5.10 § 1:7 Li ze iDan 7.13; iMat
24.30; iMak 13.26; iLuk 21.27; 1 iTesa 4.17; iZaka 12.10; iJon 19.34,37

* 1:8 Li ze iRom 1.17; Iro 22.13; Okiali 3.14

12 Mhi mu egbe nyene ni mhi me uruli ni o nu mhe e ngme. Abi mhi ro nyene egbe, mhi me ikhuli igolu ishilua ni a ri ikpa ru e nga.

13 Ifui eni ikhuli ni a ri akpa ru e nga, mhi me ogbo, “Ni o li abi Omi Ogbọ.”† O so itsua na dogo ni e ramhi oli imekene awe, ni o ri ugbhogbho igolu mu aye.

14 Ukhomhi ali itsu eyoli ee pfuase abi afuolu, ee pfuase pepere abi otughunu opfopfo, ikpamhi alo eyoli e li abi elemhi erali.

15 Awe eyoli e ge nyagha abi akhuli ide. Uruli oyoli oo de limhilimhi abi ikhoshе oyi utumhi oke nofunе ni o rote ikhomhi eche tu e tiemhile.‡§

16 Obita oyoli o mu ikpetata ishilua mhue, itakobi ozalo eva o rote unu oyoli lasese. Alo eyoli e ga nyanyanya abi ovo o khueghie unu-a.

17 Abi mhi ro me oli, mhi de yeshi oli awe abi oni o she ghu-a. Ama o ri obita oyoli nga mhe egbe, oo mhe, “Khi na ulishi, mhemhe mhi khi Onodode ni mhi khi oni o kpe ukhokho.*

18 Mhemhe mhi khi Oni o la agbo, Mhi kpe ghua, ghe khe khi mhi la agbo agboagbo. Mhi mu okpe eghuli ali ilimhi mhue obo.

19 “Irarigho, keke emini u me, emini aa me mena, ali emini a ya me ini oo dene.

20 Osheli oyi ikpetata ishilua ni u me mhe obita ali ikhuli igolu ishilua ni a ri ikpa ru e nga na. Eni ikpetata ishilua wewe e khi eni igeni ena igbaa oyi eni e mie iJesu iKirisiti suo ishilua, eni ikhuli ikpa

† 1:13 Li ze iDan 7.13 ‡ 1:15 Li ze Ezik 1.24; 43.2 § 1:15 Li ze iDan 7.9; 10.6 * 1:17 Li ze Aza 44.6; 48.12; Iro 2.8; 22.13

ishilua e khi igbaa nya eyi eni e mie iJesu iKirisiti suọ ishilua.

2

Ebe ni a keke ghi igba eni e miesuo ena eoli Efesosi

¹ “Keke enana ghi agheni na igbaa oyi eni e mie iJesu iKirisiti suọ ni o la eoli Efesosi: Enana e khi ingmemhi eyi oni o mu ikpetata ishilua mhue obita, ni o o kia ifuabo eyi ikhuli igolu ni a ri ikpa ru e nga. ² Mhi lese onete ni aa ri ele ali itotobo gbe akanya oye ali iregbemie oye e. Mhi lese khi aa ya so ebo okhoro shi iteva oye e, ali khi a she mu ebo ni e lu ebewe ighiusomhi na keke fe bino, a me khi ebhori ee lo.

³ A she mhue iregbemie, a ri egbe mie ommu irari eva oyemhe, aa ti egbe je ukhoko.

⁴ Ama mhi mhori ona ya gue shi e egbe, khi a she kie inono ni a te ke mhue.

⁵ A sato ashini a ti nga ramhi elemhi ayemhe ni a te de. A mu pfi, ni a ri ele emini a kpe te eke e ri ele gbo ke ri ele. Ini aa mu pfi, mhi ya bhale deba e ya wolokhuli ni a ri ikpa ru e nga eye e ashini e la le.

⁶ Ama a mhue onete ona ni a ri ele. Eri angeli eyi ebo iNikolaita e kpare e, ni o khia khi e lili e kpare mhe.

⁷ Oni o ze eso, o ro suọ abi Ayemhe o gue e ye igbaa oyi eni e mie iJesu iKirisiti suọ nya.* Oni o da mu o le ne, mhi ya lama na li ni o le ukpamhi ora oyi agbo ni o la Apfe oyi Eshinegba ni o la iloghie.

* **2:7** Li ze Igbae 2.9; Iro 22.2; Ezik 28.13; 31.8

Ebe ni a keke ghi igba eni e miesuo ena eoli iSimirina

⁸ “Keke enana ghi aḡeni na igbaa oyi eni e mie iJesu iKirisiti suo na eoli iSimirina.†

“Enana e khi ingmemhi eyi oni o ralo ni o gbo kpe ukhokho, ni o ghu-a ni o gbo bhale agbo.

⁹ Mhi lese osoli ali umhame oyeḡ, ama a mholi epfue. Mhi lese ungmehi opfueche ni egbo ni e lu egbewe iJu ni ea khi, e ro o pfueche e-a, no khia khi egbo owa ugamhi oyi okphaghiḡ e khi.

¹⁰ A khi na ulishi osoli ni oḡ bhale na e. A ghe i, okphaghiḡ o ya pfi eghuo lo oḡba ighumha ni a mu e fe bino, a ya nase e ogbele igbe. A mu irudunga oyeḡ mhue ramhi eghuli, egheghe agho, mhi ya ri arula oghie agbo na e.

¹¹ Oni o ze eso, o ro suo abi Ayemhe o gue e ye igbaa oyi eni e mie iJesu iKirisiti suo nya. Oni o da mu o le ne, eghuli ni uzeva oa ya ramhi oli egbe.‡

Ebe ni a keke ghi igba eni e miesuo ena eoli iPagamu

¹² “Keke ona ghi aḡeni na igbaa oyi eni e mie iJesu iKirisiti suo na iPagamu.

“Enana e khi ingmemhi eyi oni o mholi itakobi ozalo-eva ni o lolo e mu.

¹³ Mhi lese ashini a la, ikhi ashini okphaghiḡ o ri ukpekhomhi oyoli shi. Ama a kie mu eva oyemhe mhue. Aa kie irudunga ni a mholi na mhe. Gbo li shi egheghe oyi Atipasi, ni o khi otsele oyemhe ni o migha shi igesikia, ni a gbe-a shi ifu apfe oyeḡ ashini okphaghiḡ o ngeli.

† **2:8** Li ze Aza 44.6; 48.12; Iro 1.17; 22.13 ‡ **2:11** Li ze Iro 20.14; 21.8

14 Ama mhi mhue ikuku ingme shi e egbe. A mholi egbo eghuo iteva oye ni e mu ose ni oyi iBelamu mhue. Lori o sese oghie iBalaki o di egbo iZireni lo olamhe. Eri o gueye we e le eminale ni a ro luase obo na ikhumhi ali e ke ku itsebo. §

15 Igho a gbo mhue egbo ni e mu ose ni oyi iNikolaita mhue.

16 Irarigho, a mupfi. Ini o a khi igho, mhi ya keke bhale ya ri itakobi ni o la mhe unu nu we kholi.

17 Oni o ze eso o ro suo abi Ayemhe o gueye igbaa oyi eni e mie iJesu iKirisiti suo nya. Onini o da mu o le, mhi ya ri ibuledi eghuo ni a ro sheli na li le. Mhi gbo li ya ri eche opfopfo na li ni a keke eva onogbo shi, ni ogbo okhoghuo o a lese, se ni ogbo ni o mie oni echeli.*

Ebe ni a keke ghi igba eni e miesuo ena eoli iTiatira

18 “Keke ona ghi agheni na igbaa oyi eni e mie iJesu iKirisiti suo na eoli iTiatira: Enana e khi ingmemhi eyi Omi Eshinegba ni o mhue ikpamhi alo ni e ge abi elemhi erali, ni awe eyoli e li abi ide.

19 Mhi lese ikanya eye e, abi a li mholi inono ali irudunga ali abi a li ga egbe e ali iregbemie ni a mholi. A gbolo e ri ele memena dose abi a te eke li.

20 Ama mhi mhue ingme onana ni mhi ya gue shi e egbe. A mie oni okpotso iJezebe ogho lama, oni o lu egboli omekeguele. Rote ose ni oyoli o te di eni ee ga eyemhe ya lo itsebo, ni e gbolo a le eminale ni a ro luase ikhumhi. †

§ 2:14 Li ze iNoba 22.5,7; 31.16; iDeut 23.4; iNoba 25.1-3 ze Okiali 16.14-15; 16.33-34; iJon 6.48-50; Aza 62.2; 65.15 * 2:17 Li ze 2:20 Li ze 1 Ighie 16.31; 2 Ighie 9.22,30

21 Mhi she ri eghẹghẹ na li ni ọ rọ mupfi lase itsebo eyoli le, ama ọa ghọle ọli.

22 A ghe i, mhi ya ri ughuamhi pfi ọli gbe she ukpho osoli, mhi ya pfi egbọ ni e nu ọli kia okia lo osoli, seẹ ni e mupfi lase ode okhọlo oyoli le.

23 Mhi ya ri eghuli gbe imioli, eghẹghẹ aghọ eni igbaa nya eyi eni e mie iJesu iKirisiti suọ e ya lese khi mhemhe khi oni ọọ bino udu ali isamhi eyi ogbọ. Mhi ya fali e ota abi ogbogbo o li gbe.‡

24 “Ama eẹ ni e kpole shi eoli iTiatira ni ẹa lama mu osese eyi ijezebe mhue, ni aa lama wena owena eyi okphaghiẹ ni eẹ lu osheli ni e limhi, mhi aa ya khi omhesẹ olese nga e ike.

25 A lese mu emini a mhọli mhue obọ egbegbo ya ramhi ni mhi rọ ya bhale.

26 Oni o mu o le, ni o ri oghuemhe oyemhe gbe ya ramhi ukpesẹ, mhi ya ri ishishi nali ke mhese shi.

27 ‘O ya ri akhuli mhue obọ ke mhese na we, o ya guoghọ we-a abi a lie ma ekhe.’S

28 O ya mhọli afu onabi mhi rote obọ oyi Itamhe mie. Mhi gbo ri ukpetata anukpesumegie na eluzogbe na li.

29 “Oni o ze eso, o rọ suọ abi Ayemhe o gueye eni igbaa nya oyi eni e mie iJesu iKirisiti suọ.

3

Ebe ni a kẹkẹ ghi igba eni e miesuọ ena eoli iSadisi

1 “Kẹkẹ ona ghi aḡeni na igbaa oyi eni e mie iJesu iKirisiti suọ na eoli iSadisi.

‡ 2:23 Li ze *Iwolo* 7.9; *iJere* 17.10; *Iwolo* 62.12 § 2:27 Li ze *Iwolo* 2.8-9

“Enana e khi ingmemhi eyi oni o mu iyemhe ishilua eyi Eshinegba ali ikpetata ishilua mhue. Mhi lese ikanya eye. A mholi eva onete abi ezeze khi a la agbo, ama eri a ghua.

² A guale ni a zese emini o kpo e le-a ni e nono ni e ghua. Irari khi mhi me ikanya eye khi ea gba pfo odalo oyi Eshinegba oyemhe.

³ A ri itobo igho sato emini a she mie ni a suo, a ri oli gbe akanya, a mupfi. Ama ini aa da guale, mhi ya bhale abi oghiat, aa ya lese eghenge ni mhi ro ya bhale na e.*

⁴ Abi o kie li ena, a kie mhue egbo eghuo eoli iSadisi ni ea ri ichimhi mu itsua eyewe. E ya so itsua epfopfo nu mhe kia, irari khi e te o.

⁵ Oni o mu o le, igho o li ya so itsua epfopfo. Mhi aa ya shishi eva oyoli ebe ni a keke eva oyi eni e ya mholi agbo na agboagbo shi-a. Ama mhi ya ngme ingme oyoli le khase itamhe ali igeni eyoli.†

⁶ Oni o ze eso, o ro suo emini Ayemhe o gueye eni igbaa oyi eni e mie iJesu iKirisiti suo nya.

Ebe ni a keke ghi igba eni e miesuo ena eoli iFiladefia

⁷ “Keke ona ghi ageni na igbaa oyi eni e mie iJesu iKirisiti suo na eoli iFiladefia. Ena e khi ingmemhi eyi oni o pfuase, ni o khi igesikia, ni o mholi okpe oyi iDefidi. Oni o kha khueghie-a, ogo o la o ni o dobe ya khukhu, oni o kha khukhu, ogo o dobe khueghie-a.‡

* 3:3 Li ze iMat 24.43-44; iLuk 12.39-40; Iro 16.15 † 3:5 Li ze Okiali 32.32-33; Iwolo 69.28; Iro 20.12; iMat 10.32; iLuk 12.8 ‡ 3:7 Li ze Aza 22.22; iJobu 12.14

⁸ Mhi leşe ikanya eye ẹ. A ghe i, mhi she khueghie ode-a shi eke na ẹ, ni ọgbọ ọa dobe ya khukhu. Mhi leşe khi ukuku itoto a mholi, abotseku khi igho, a kie ri ungmehi oyemhe ẹ gbe akanya, aa tigbe kie eva oyemhe.

⁹ A ghe i, mhi ya ri eni e la owa ugamhi oyi ọkphaghiẹ ni ẹ lu egbewe iju ni o khia khi egbholi ẹ lo, bhale ya nyese ukhomhi shi ẹ ufuege ni e leşe khi mhi nono ingme oyeẹ. §

¹⁰ Irari khi a ri omhesẹ oyemhe gbe akanya ni o gueye ẹ a ri irabomudu ri egbe mie, mhi ya rue ẹ imufe le, ni ọọ bhale eke agbo nya. Imufe ni o ya mu egbo na agbo nya fe bino.

¹¹ Mhi ya kele bhale. Mu emini u mholi mhue toto, ini ọgbokhoghuo ọ khi mie ẹ arula oghie oye.

¹² Oni ọ da mu ọ le ne, mhi ya roli khi ọche elemhi Owa ugamhi oyi Eshinegba oyemhe. Ọa ya tigbe rote agho vu. Mhi ya keke eva oyi Eshinegba oyemhe shi ọli egbe, li shi eva oyi ẹoli oyi Eshinegba oyemhe ni o khi iJerusalemu onogbo, ni o rote Eghiele oyi Eshinegba oyemhe ẹ tiemhile ali eva onogbo oyemhe.*

¹³ Oni ọ ze eso, ọ suọ emini Ayemhe o gue ẹ ye eni igbaa oyi eni e mie iJesu iKirisiti suọ nya.

Ebe ni a keke ghi igba eni e miesuọ ena ẹoli iLaodisha

¹⁴ “Keke ona li ghi aḡeni na igbaa oyi eni e mie iJesu iKirisiti suọ na ẹoli iLaodisha. Enana e khi ingmemhi eyi Atse, ni ọ khi ọtsele oni ọ ze ri egbe

§ **3:9** Li ze Aza 49.23; 60.14; 43.4 * **3:12** Li ze Iro 21.2; Aza 62.2; 65.15

ẹ nga, ni ọ khi igesikia, oni ọ mhese ẹ na emini Eshinegba ọ ma nya.†

15 Mhi lese ikanya eye ẹ khi, aa mhuẹ utomhi wekhi eri a pfo. O kha ti ini a khi oghuo ọ lo.

16 Irarigho, itobo khi a rimhe, ni aa ro to wekhi eri a pfo, mhi ya rote unu oyemhe to ẹ pfa.

17 Irari khi a lie, 'Mhi pfue, mhi she ti epfue ma, mhi aa ke mhuẹ emini o to mhe.' Ama aa lese khi egbo eyemhe a khi, eni a vie osoli ẹ na, ena umhame, ni e khi ezalo ali ebanqa.

18 Irarigho, mhia ye ẹ ude ni a nu mhe de elomho ni a ri erali nye-a ini a mele eni e pfue-a, ni a mholi itsua epfopo ni aa so, ni a ro khukhu irumheba omama eye ẹ. Ni mhi ri ogugu na ẹ vi shi alo ni a ke me eke.

19 Egbo ni mhi nono ingme oyewe, mhi ya dese, mhi gbo sheshe we shi ode, irarigho a mhuẹ omuegbe ni a mu nyene.‡

20 A ghe i! Mhi migha ode mhia kpheli obo ọ, ini ogbokhoghuo ọ suo uruli oyemhe ni ọ ro khueghie-a na mhe, mhi ya lo le, mhi nu oli le, ọ nu mhe le.

21 Oni ọ mu ọ le, mhi ya lama na li ni ọ nu mhe shito ukpekhomhi oghie oyemhe, ezeze abi mhemhe mhi li mu ọ le ni mhi nu Itamhe shito ukpekhomhi oghie oyoli.

22 Oni ọ ze eso, ọ ro suo emini Ayemhe o gueye eni igbaa nya eyi eni e mie iJesu iKirisiti suo."

4

Ugamhi na iloghie

† 3:14 Li ze Ekpi 8.22 ‡ 3:19 Li ze Ekpi 3.12; Iburu 12.6

¹ Abi mhi ro me ena dose se, mhi ke gbo me imeke olese. Mhi me khi ode o khueghie-a shi iloghie, mhi suo khi uruli ni o kpe nu me mhe ngme abi akala. Oo mhe, “Bhale odane ana, khi mhi ya re khasa emini a ya me ini ena e dose se.”

² Utoghuo kpe mhi la elemhi Ayemhe, mhi me odalo oyemhe khi ukpekhomhi o migha iloghie, khi ogbo o shito nga o.

³ Oni o shito o, o li abi eche ni oo ge ni a lu ijasipa ali ikaneliani. Ogaji ni o li abi eche ughegbe ni a lu emeradi o vi gasa oni ukpekhomhi.*

⁴ Ipekhomhi uye ali ene elese e la gasa oni ukpekhomhi. Egbhali uye ogbo ali aane e shito oni ikpekhomhi. E so itsua epfopfo, e rughu irula oghie igolu shi ukhomhi.

⁵ Rote oni ukpekhomhi oghie, inyamhisalo amee ali ingmolo oyi akphala e te o o lasele. Rote oni ukpekhomhi oghie ikpa ishilua e lala ni e khi Ayemhe ishilua eyi Eshinegba.†

⁶ Ali khi oni ukpekhomhi khi emini o li abi oko ighegbe oniemhi o la odalo oli ni o pfuasa ni a te e me eke gboo.

Elamhako aane ni e mhuo ayemhe ni e ze alo gasa egbe odalo ali ukhokho, e le gasa oni ukpekhomhi oghie roli shi iteva.

⁷ Emini o mhuo ayemhe onodode o li abi idu, onuzava o li abi ena, onuzasa o ze alo abi ogbo, onuzi-aane o li abi akpa odegbe ni oo fiala.‡

⁸ Eni elamhako aane ena e mholi ipfua esesa esesa, e mholi ikpamhi alo gasa idiegbe, li ghe

* **4:3** Li ze Ezik 1.26-28; 10.1 † **4:5** Li ze Okiali 19.16; Iro 8.5; 11.19; 16.18; Ezik 1.13; Iro 1.4; iZaka 4.2 ‡ **4:7** Li ze Ezik 1.22,5-10; 10.14

elemhi ipfua eyewe, Ele ɔguota ali ele iyose ɛa tigre
 ɛ yemhe-a, eri e lese lie,

“Ipfuase, ipfuase, ipfuase
 khi Eshinegba Onomhue
 Nofune nya,

Oni ɔ khi loli,
 ni ɔ kie kpe khi loli,
 ali ni ɔ ya bhale.”§

⁹ Ini eni elamhako aane egho e da ri ufumhi ali
 ekpe ali ikphemhi na oni ɔ shito oni ukpekhomhi
 oghie ne, ni ɔ lao a le ele na agboagbo,

¹⁰ eni egbhali uye ogho ali aane egho, e de ya
 yeshi na oni ɔ shito oni ukpekhomhi, e ri kphemhi na
 oni lao a le ele na agboagbo. E gueghie irula eghiele
 eyewe shi eke odalo oni ukpekhomhi oghie, ee lie.

¹¹ “U teo Onomhue ali
 Eshinegba oyanye,
 Ni ɔ mie ufumhi
 ali ekpe ali ekpabo,
 Irari khi yeye u ma emhikpa.
 Oghuemhe oye u ro ma we,
 loli e gbo ro lao abi a li ma we.”

5

Ebe ali Omi Osumha

¹ Mhi ke gbo me oni ɔ shito oni ukpekhomhi
 oghie khi ɔ mu ebe ni a keke emhi shi odalo oli
 ali ukhokho oli mhue obita. A ri erueli rote asha
 ishilua to oli ma.*

² Mhi me ageni ni ɔ fune ni ɔ tsesengme leghe oo
 lie, “Oghuo ɔ ya dobe maghie eni erueli oni ebe-a?”

§ 4:8 Li ze Ezik 1.18; 10.12; Aza 6.2-3 * 5:1 Li ze Ezik 2.9-10; Aza 29.11

³ Ama ogbokhoghuo o la iloghie, wexhi eke agbo, wexhi ikpoke na agbo, ni o dobe khueghie oni ebe-a, ukeneta khi eri o dobe ya bino elemhi oni ebe.

⁴ Mhi vie egbegbo irari khi aa me ogbo ni o teo ni o ya khueghie oni ebe-a wexhi ni o bino elemhi o.

⁵ Otuoghuo eni egbhali egho o mhe, “Khi ke vie! Ghe khe, Odumhi na unuekpe oyi iJuda, Omiami iDefidi o she mu o le. O dobe ya khueghie oni ebe-a ali erueli ishilua eyoli.”†

⁶ Igho mhi me khi Omi Osumha khi o migha odalo oyi oni ukpekhomhi oghie ni elamhako aane egho, ali eni egbhali e gase. O li abine khi a she kpe gbe o-a. O ze ekphali ishilua ali ikpamhi alo ishilua ni e khi Ayemhe ishilua eyi Eshinegba ni o she ghie je eke agbo nya.‡

⁷ Oni omi osumha o le ya rue oni ebe obita oyi oni o shito oni ukpekhomhi oghie.

⁸ Abi o ro rue oni ebe se, eni elamhako aane egho ali egbhali uye ogbo ali aane, e de yeshi odalo oyi oni Omi osumha. Wewe nya ogbogbo o mu efa mholi obo ali itasa igolu ni ituale afu era ni a tose e vo, ni e khi iromhi ni eni Eshinegba o she pfa na e so.§

⁹ E to uwolo onogbo, e lie,
 “U te oni o rue oni ebe,
 u gbo te oni o ya maghie
 erueli ni a ro ma o-a,
 Irari khi a gbe-a,
 U ri o lia eye de egbo
 na Eshinegba,

† 5:5 Li ze Igbae 49.9; Aza 11.1,10 ‡ 5:6 Li ze Aza 53.7; iZaka 4.10

§ 5:8 Li ze Iwolo 141.2

egbo ni e rote agbo nya bhale
 rote unuekpẹ nya ali
 emue ododa ali egbo ododa nya.*

10 U rewe mele ighie
 ali ekpodalo-ugamhi ni ẹ ga
 Eshinegba oyawa-a.

E ya la agbo ke mhesẹ.”†

11 Mhi bino mhi suo iruli eyi igeni ebubu ni e
 ramhi igbele ali idududu. E le gasẹ oni ukpekhomhi
 oghie ali elamhako egho ali eni egbhali.‡

12 E ri ukpokpomhi uruli i to uwolo, e lie,
 “Oni o teo Omi osumha
 ni a gbe-a o khi,
 ni o mie ekpabo ali epfue
 ali ilasingme ali itoto,
 ali ekpe ali ufumhi
 ali ikueghie!”

13 Mhi tigbe suo khi emhikpa ni a ma na iloghie
 ali eke agbo ali ikpoke na agbo ali ena oke oniemi
 ali emini e lao elemhi o ni nya khi ẹ to uwolo, ẹ lie,

“Oni o shito oni ukpekhomhi
 ali Omi osumha,
 Ikueghie ali ekpe
 ali ufumhi ali ekpabo,
 e khi eyeẹ, rote
 agboagbo ya je agboagbo!”

14 Eni elamhako aane egho ẹ li, “Atse,” eni egbhali
 egho, e de yeshi, e ga li.

* 5:9 Li ze *Iwolo* 33.3; 98.1; *Aza* 42.10 † 5:10 Li ze *Okiali* 19.6; *Iro*
 1.6 ‡ 5:11 Li ze *iDan* 7.10

6

Eni erueli

¹ Mhi tokpe bino abi oni Omi Osumha o ro maghie erueli onodode elemhi eni erueli ishilua-a. Mhi suo khi oghuo eni elamhako egho o ngme abi uruli akphala, oo li, “Bhale!”

² Mhi bino, ghe achi opfopfo odalo oyemhe khe! Omose ni o nga li o mu usheli mhue, a ri arula oghie na li, o nga oni achi ya fie abi okholi-okhue ni o kholi mu o le ni o gbo vu ya kholi mu o le.*

³ Abi oni Omi Osumha o ro maghie erueli onuzi-eva-a, mhi suo khi elamhako onuzava o ngme, oo li, “Bhale!”

⁴ Mhi me khi achi olese ni oo yile nyoghoo o fie lasele. A ri afu na oni o nga li ni o ro rue opfomhe eke agbo-a, ni o ro ri egbo ke gbolo egbe we-a. A ri ogbhoroo oniemhi na li.†

⁵ Abi oni Omi Osumha o ro maghie erueli onuzi-ese-a, mhi suo khi elamhako onuzi-aase o ngme, oo li, “Bhale!” Mhi bino, ghe achi obishi odalo oyemhe khe! Oni o nga li o mu emini a ro o mhese ukhomhi oyi emhi.‡ ⁶ Mhi suo khi emini o li abi uruli o la elemhi ifuaboo oyi eni elamhako aane egho ngme, oo lie, “Ifata ogbeleghuo a ri ago oghuo oyi ado e de, idiakpala ese oyi oakpa, o li migha shi ifata ogbeleghuo. Khi yese oili olivu-a ali onyo!”

⁷ Abi oni Omi Osumha o ro maghie erueli onuzi-ene-a, mhi suo khi uruli oyi elamhako onuzi-aane oo li, “Bhale!”

* 6:2 Li ze iZaka 1.8; 6.3,6 † 6:4 Li ze iZaka 1.8; 6.2 ‡ 6:5 Li ze iZaka 6.2,6

⁸ Igho mhi me achi ni o li abi oni o ya ghu-a. Oni o nga li a lui Eghuli, ali eghiele ilimhi oo deba li udidi, a ri afu na we ni e ro ri ogbhoro ali okiamhi ali ighuamhi ali elamhako okhena gbolo egbo iku akemhishi asha ene egbo na eke agbo-a. §

⁹ Abi oni Omi Osumha o ro maghie erueli onuzi-ishe-a, mhi me iyemhe eyi egbo na gbolo-a irari ungmamhi oyi Eshinegba ali otsele ni e mu mhue ufui oni atete.

¹⁰ Ee vie leghe, e lie, “Onomhue ni o khi ona ipfuase ali igesikia, egheghe onoghuo u ro ya gue egbo na agbo ezọ, ni u ro ya ye okhue oia eyi anye obọ oyewe na anye?”

¹¹ Egheghe agho, a ri itsua epfopfo na we. A gueye we e migha ne ukuku o, ramhi egheghe ni eni ee ga nabi wewe etuangme ni a nono ni a li gbolo-a e ro ya gba. Ezeze abi a li gbolo wewe-a.

¹² Mhi bino abi o li khueghie erueli onuzi-esesa-a. Ukpokpomhi eke o kulue. Ovọ o bishi-a abi ode abuma ni a ri iriria elamhi do. Uki nya o yile-a abi oia.*

¹³ Ikpeta na idane e deno kule eke abi ikpamhi okhua-eni ni ea yile ne e lie de kule ini akpekpeli ni o ze o jighise we.

¹⁴ Irarogbe o khili ode-a abi a lie khili ighele eke-a. Ite nya ali eke ni e la iteva oke, a rue we ashini e la le. ††

¹⁵ Egheghe agho, ighie na eke agbo ali ekhemhue ali idenomọ okholi ali eni e mholi epfue ali eni e

§ 6:8 Li ze Ezik 14.21 * 6:12 Li ze Iro 11.13; 16.18; Aza 13.10; iJọ 2.10,31; 3.15; iMat 24.29; iMak 13.24-25; iLuk 21.25 † 6:14 Li ze Iro 16.20 ‡ 6:14 Li ze Aza 34.4

mholi ekpabo ali ogbokpa ali ighumha ali eni e a khi ighumha, e na ya sheli ifui irui ali eche na ite. §

¹⁶ Ee vie lu ite ali eche eniemhi, e lie we, “A de mu anye ni a ri anye sheli eloe oyi oni o shito oni ukpekhomhi oghie ali ofu oyi oni Omi Osumha!”*

¹⁷ Irari khi ogbele ofu oniemhi oyi Eshinegba o she ramhi ni o ro ya tiemhile shi we o, oghuo o dobe ya migha?”†

7

Egbo agbele egbhueshilua ali ene (144,000) ni a shi olele

¹ Ona o dose se, mhi ke gbo me khi igeni aane e migha iguabo enenene na eke agbo. E mu akpekpeli enenene na iguabo eke agbo gba ini akpekpeli o khi ke li eke agbo, we ukhomhi oke oniemhi we eera.*

² Igho mhi ke me ageni olese khi o rote obini ovo o te e ngale lasese, o tsua akhuli ni a ro o shi emhi olele oyi Eshinegba ni o la agbo. O ri uruli na leghe lu eni igeni aane egho ni a ri ekpabo na ni e ro yese eke ali oke oniemhi-a.

³ Oo we, “A khi yese eke-a we oke oniemhi we eera, se khi awa shi olele shi eni ee ga eyi Eshinegba alukpo se.”†

⁴ Igho mhi suo khi eni a rote elemhi edeli eyi iZireni nya shi olele, e ya khi egbo agbele egbhueshilua ali ene (144,000).

⁵ A rote unuekpe oyi ijuda,

§ 6:15 Li ze Aza 2.19,21 * 6:16 Li ze Osia 10.8; iLuk 23.30 † 6:17

Li ze iJofe 2.11; iMala 3.2 * 7:1 Li ze iJere 49.36; iDan 7.2; iZaka 6.5

† 7:3 Li ze Ezik 9.4,6

shi ọlẹlẹ shi ẹgbọ
agbẹlẹ igbẹva egbe (12,000).

A rọte unuẹkpẹ oyi iRubeni,
shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iGadi,

shi ọlẹlẹ shi ẹgbọ

agbẹlẹ igbẹva egbe (12,000).

⁶ A rọte unuẹkpẹ oyi Asha,

shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iNafutali,

shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iManase,

shi ọlẹlẹ shi ẹgbọ

agbẹlẹ igbẹva egbe (12,000).

⁷ A rọte unuẹkpẹ oyi iSamọ,

shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iLiva,

shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iSaka,

shi ọlẹlẹ shi ẹgbọ

agbẹlẹ igbẹva egbe (12,000).

⁸ A rọte unuẹkpẹ oyi iZebulo,

shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iJosefu,

shi ọlẹlẹ shi ẹgbọ

agbẹlẹ igbẹva egbe (12,000).

A rọte unuẹkpẹ oyi iBejami,

shi oḷeḷe shi eḡbọ
agbeḷe igbeva egbe (12,000.)

⁹ Ona o doṣe se, mhi bino, ghe ebubu eḡbọ ni oḡbọkḡoḡhuo oḡa doḃe ya leli kḡe! Ishishi khi ishishi ali unuekpẹ nya ali eḡbọ ali emue oḡoḡa e te bhale. Igho e migha odalo oyi oni ukpeḡkḡomhi oghie, e migha odalo oyi oni Omi Osumha, e soṅo itsua epfopfo, e muno eyamhi mḡoli abo.

¹⁰ E tseṣe leghe, e lie.

“Eshineḡba oni o shito
oni ukpeḡkḡomhi oghie,
O mḡoli ekpabo
ni o ro mie eḡbọ eyoli pfuese,
igho li khi oni Omi Osumha.”

¹¹ Iḡeni nya e migha gase oni ukpeḡkḡomhi oghie, ali eni eḡbhali ali elamhako aane e de ta alo mu eke odalo oni ukpeḡkḡomhi oghie e ga Eshineḡba.

¹² E lie,

“Atse!
Ikuḡeḡhie ali ufumhi,
ali eḡbḡe ali
ikpḡemhi ali ekpe,
ali ekpabo ali itoto,
e khi eyi Eshineḡba oyawa,
eḷe na agboagbo.
Atse!”

¹³ Igho oḡbhali oḡhuo elemhi we o nu mḡe ngme o mḡe, “Eghuo egho e khi ni e soṅo itsua epfopfo? U ḷeṣe obini e te bhale?”

¹⁴ Mhie oḷi, “Oga, yeḡe u ya ḷeṣe.”‡

‡ 7:14 Li ze iDan 12.1; iMat 24.21; iMak 13.19

Oṣo mhe, “Ena e khi eni e pfue oni ukpokpomhi ajilimhe, e she pfue itsua eyewe-a, e ri oḷia eyi oni Omi Osumha rewe pfuase.

¹⁵ Irarigho,
 “E ro migha odalo
 ukpekhomhi oghie
 oyi Eshinegba.

Ni e la
 elemhi Owa oyi Eshinegba oyoli
 ke ga li ele oḡuota ali eliyose.
 Oni o shitṣo oni
 ukpekhomhi oghie oyoli,
 o ya ri okhola oyoli
 khukhu we.

¹⁶ Okiamhi o a ke
 gbo ya gbe we ghue,
 wekhi okiamṣo o ke ya gbe we ghue.
 A ya khukhu we ovṣo erere,
 o a ke tose we ghue.Ṣ

¹⁷ Irari khi oni Omi Osumha
 ni o migha odalo oni
 ukpekhomhi oghie,
 o ya ri eloe ke khu we.
 O rewe je okṣe amṣe
 ni o ri agbo a na oḡbo.

Eshinegba o ya shishi we amevie alo-a.”*

8

Erueli onuzi-ishilua

Ṣ **7:16** Li ze Aza 49.10 * **7:17** Li ze Iwolo 23.1; Ezik 34.23; Iwolo 23.2; Aza 49.10; 25.8

¹ Abi oni Omi Osumha o ro maghie erue onuzi-
ishilua-a, iloghie o kekeke elemhi iminiti uye ali
igbe.

² Igho mhi me igeni oshilua ni ee migha odalo oyi
Eshinegba, khi a ri ikala ishilua na we.

³ Ageni olese o bhale ya migha atete. O tsua ilolo
oyi elomho. A ri afu ituale ne e bu na li ni o ya tose,
gbo li shi iromhi ni eni Eshinegba o she pfa na e so.
O la oni atete elomho ni o la oni eghiele tose we.*

⁴ Ewoli eyi oni ituale afu era ni aa tose ali iromhi
eyi eni Eshinegba o she pfa na, e rote obo oyi oni
ageni nga idane deba Eshinegba.

⁵ Igho oni ageni o rue oni ilolo, o we erali ni e la
ukhomhi oni atete vo o. O pfi oli tiemhi eke agbo,
igho ikphala e de, ali ingmolo, ali inyamhise alo
ame, ali eke ikuluwe.†

Eni ikala

⁶ Mena, igeni oshilua ni e mholi ikala ishilua e
mu egbe ni e ro pfi we.

⁷ Ageni onodode o pfi akala oyoli, eche ame ali
erali e kuma oia wushe kugbe, e de ku shi ekeke.
Ukiekie opfoghwo akemhishi eshe oyi eke agbo, o to-
a. Asheghwo akemhi shi eshe oyi era nya e toa,
ebuli nya e toa.‡

⁸ Ageni onuzi ava o pfi akala oyoli, emini o li abi
ute o lala, a pfi oli lo oke oniemhi. Ukiekie oghwo ini
a kemhi oni oke oniemhi shi asha eshe o mele oia-a

⁹ asheghwo akemhi shi eshe elamhako ni e la o e
ghulua, asheghwo akemhishi eshe oko-oke oniemhi
ni e la oni oke e tseke-a.

* **8:3** Li ze Emọ 9.1; Okiali 30.1,3 † **8:5** Li ze iLev 16.12; Ezik 10.2;
Okiali 19.16; Iro 11.19; 16.18 ‡ **8:7** Li ze Okiali 9.23-25; Ezik 38.22

¹⁰ Ageni onuzase o pfi akala oyoli, ukpokpomhi ukpetata ni o lala abi ugbili, o rote idane pfa, o de ya shi asheghuo akemhi okẹ nya shi asha-esẹ ali inu wẹ ni okẹ e te ẹ chocho. §

¹¹ Eva oyi oni ukpetata a lu Oyala. Asheghuo akemhi-shi esẹ amẹ eyi okẹ nya ni o de pfilo egho e yala, ebubu egbo e ghuloa irari khi eni amẹ okẹ e yala.*

¹² Ageni onuzi-aane o pfi akala oyoli, a gbe emhi shi asheghuo akhi ovo-a shi asha esẹ, ali akhi uki-a shi asha esẹ, ali akhi ikpetata-a shi asha esẹ. Eni asha esesese ena e bishi-a. A khi ogbe-a shi asha esẹ, o bi obili-a, igho a li li khi eliyose-a shi asha esẹ, akpa ọa ge. †

¹³ Abi mhi li bino egho, mhi suo khi akpa odegbe ni o la irarogbe fiala, o vie, o lie, “Epfua, Epfua! Epfua o khi na eni e la eke agbo itobo ikala ni igeni aase enekpole e ya pfi.”

9

¹ Ageni onuzi-oshe o pfi akala oyoli. Mhi me ukpetata ni o rote idane de tiemhile ekekhe. A ri okpe oyi ode oyi ilimhi na ningolo na li.

² Abi o ro khueghie ode oyi oni ilimhi na ningolo-a, ewoli e rote o lasele abi ewoli ni e rote avuere lasele. Ovo ali irarogbe e bishi-a irari eni ewoli ni e rote oni ilimhi na ningolo lasele.*

³ Initso e rote eni ewoli ve e kule eke agbo, a ri afu na we ni e ro mhuẹ ekpabo nabi eyi izage. †

§ 8:10 Li ze Aza 14.12 * 8:11 Li ze Jere 9.15 † 8:12 Li ze Aza 13.10; Ezik 32.7; ijofe 2.10,31; 3.15 * 9:2 Li ze Igbae 19.28 † 9:3 Li ze Okiali 10.12-15

⁴ A gueye we e khi ri unu ti ebuli ali emhi ekomhi okhoghwo wekhi oora na eke agbo, ama e ke nase egbo ni ea mholi olele oyi Eshinegba shi alukpo oyewe.‡

⁵ Aa lie we e gbolo eni egbo ena-a, ama ni e ro nase we iki ishe. Utomhi ni e to we, eri e li abi utomhi oyi okpi ini o ta ogbo.

⁶ Egheghe ni a ngme ena, egbo e ya ke nono eghuli ama ea ya me, o ya ghole we ni e ghu-a ama eghuli o ya me we na. §

⁷ Eni initso e li abi ichi ni a mu egbe shi okholi. E rughu emini o li abi arula oghie igolu shi ukhomhi, alo eyewe e li abi alo egbo.*

⁸ Itsu eyewe e li abi itsu eyi ikpotso, akọ eyewe e li abi akọ idumhi.†

⁹ E ze ipfiapfia shi egbe abi awulu akhuli ni okholi-okhue o ro a mu aye. Okeke ni ipfua eyewe e kpe, e li abi okeke oyi ichi ikhuli ni e lo bu ni e na le okhue.‡

¹⁰ E ze ighia ali eka, ee ta abi ikpi, e mholi ekpabo shi eni ighia ni e ro na egbo osoli iki ishe.

¹¹ E mholi oghie oyewe ni o khi ageni oyi ilimhi na ningolo. Abi a lu eva oyoli o khi Abadoni a lu oli elemhi Iburu. Ama Apolioni a lu oli elemhi iGiriki. (Oni o Yese-a a ri ona ngme.)

¹² Epfua onodode o she dose, ama epfua eva elese ea bhale ne.

Akala onuzi-esesa

‡ 9:4 Li ze Ezik 9.4 § 9:6 Li ze iJobu 3.21; iJere 8.3 * 9:7 Li ze iJofe 2.4 † 9:8 Li ze iJofe 1.6 ‡ 9:9 Li ze iJofe 2.5

¹³ Ageni onuzi-osasa o pfi akala oyoli, mhi suo khi uruli o rote igo ene oyi atete igolu ni o kpo eke le ni o la odalo oyi Eshinegba ngme lasese. §

¹⁴ O gueye oni ageni onuzi-osasa ogho oo li, “Taghie igeni aane ni a ge shi epfe oke oniemhi na lu iYufiretisi-a.”

¹⁵ Igho a li rue eni igeni aane egho obo-a, ni a she ge shi agho, ro khe oni eghoghe ona, ali ogbele ali uki ona, ali ukpe ona, ni e ya gbolo egbo igbekhi ese na eke agbo ona-a.

¹⁶ Ekholi-okhue etuangme ni a ro shi eke e khe okholi e bu ramhi udududu asha egbhuegbe, 200,000,000. Mhi suo etuangme ni a lu we.

¹⁷ Abi eni ichi ali eni e nga we e li na, abi mhi me we elemhi imealo oyemhe. Iwulu ikhuli ni ekholi-okhue e ro o mu aye eyewe, ee yile nyogho abi erali, e li abi egholi ibulu na koli, o mholi oyile abi ofu. Ikhomhi eyi eni ichi e li abi ikhomhi idumhi, erali, ewoli ali ofulu e rote we unu lasese.

¹⁸ Igbekhi asha ese egbo nya, eni erali ali ewoli ali ofulu ni e rote we unu lasese e gbolo-a.

¹⁹ Ekpabo eyi eni ichi e la we unu ali ighia. Irari khi eri ighia eyewe e li abi enye, e ze ikhomhi ni e ro kuale egbo utse.

²⁰ Egbo ni e kpole shi agbo ni oni opfuse o gbolo-a, ea kie mu pfi lase ikanya abo eyewe le. Ea lase ekphaghie igaga le, li shi ugamhi eyi ikhumhi ni a ri igolu ali elomho ali ide ali eera khali. Ikhumhi ni ea ya me eke wekhi eri e suo eso, wekhi eri e dobe e kia.*

§ 9:13 Li ze Okiali 30.1-3 * 9:20 Li ze Iwolo 115.4-7; 135.15-17; iDan 5.23

21 Wẹkhi eri e lama mu pfi lase ugbeli le, ali imhẹse imumu ali itsebo ilili ali ighiatọ idodo.

10

Ọni aḡeni ali ebe nikeke

¹ Igho mhi me aḡeni nofunẹ ọlese, khi ọ rote idane e tiemhile, ọ ri otughunu khukhu egbe, ogaji o vi gase ọli ukhomhi, alo eyọli e li abi ovo, awe eyọli e li abi oche erali.

² Ọ mhọli ukuku ebe mhọli obọ ni o khueghie-a shi eke. Ọ gbosẹ owe obita oyọli shi elemhi oke oniemi, ọ ri owe ogobo nga eke.

³ Ọ ri ukpokpomhi uruli pfi lasele leghe abi odumhi ọọ khoshe. Abi ọ ro pfi, uruli ikphala ishilua e ngme.

⁴ Abi eni ikphala ishilua e ro ngme se, mhi nono ni mhi keke shi ebe, ama mhi suo khi uruli ọ rote idane lie, “Ri emini eni ikphala ishilua egho e ngme sheli, khi keke we shi eke.”

⁵ Igho oni aḡeni ni mhi me ni ọ migha oke oniemi ali ekeke egho, ọ yase obita oyọli nga ukhui.

⁶ Ọ ri eva oyi Eshinegba ni ọ laọ le ele na agboagbo romhi ishe. Oni ọ ma ukhui ali emhikpa ni e laọ, ali eke ali emhikpa ni e la ọ ali oke oniemi ali emhikpa ni e laọ. Ọọ, “Emhi enana ẹa ke ya tese ni e ro bhale ya tse.

⁷ Ama khi ogbele ni aḡeni onuzi-oshilua ọ da ya pfi akala oyọli, Eshinegba ọ ya khueghie osheli oyọli-a ni ọ gba abi ọ li gue ọli ye eni ẹẹ ga ni e khi emekeguele eyọli.”*

* **10:7** Li ze Okiali 20.11; iDeut 32.40; iDan 12.7; Emo 3.7

8 Igho uruli ni mhi rote iloghie suo egho o gbo nu mhe ngme, oo mhe, “Le ya mie agheni ni o migha oke oniemhi ali ekekhe ighela ebe ni o khueghie-a, ni o la li obo.”

9 Igho mhi le deba oni agheni mhi o ri oni ebe nikeke ogho na mhe. Oo mhe, “Mo oli le. O ya yese e elemhi-a, ama o ya violo e unu abi iwo.”

10 Mhi mie oni agheni oni ebe nikeke obo, mhi roli le. O violo mhe unu abi iwo, ama abi mhi ro roli le se, oo yala mhe elemhi.†

11 Igho a gueye mhe, “U mema ya mekeguele shi ebubu unuekpe, ali egho ali emue ododa ali ighie egbe.”

11

Eni otsela aava

1 Igho a ri ufulo ni o li abi ukpokpo ni a ro o mhesa emhi na mhe, a gueye mhe, “Le ya mhesa Owa Ugamhi oyi Eshinegba ali atete ali eni e ga ugamhi akaghoo.*

2 Khi mhesa atukpapfe oniemhi oyoli, khi mhesa oli irari khi a she roli na ijeta. Wewe e ya lighi oni eoli no pfuasa eke-a elemhi iki egbhueva ali eva (42.)†

3 Mhi ya ri afu na otsela aava eyemhe. E ya meke guele elemhi ogbele agbele ali egbhuegbese (1,260.) E so ide ibuma.”

4 Otsela aava ena e khi eera olivu eva ali emhi eva ni a ri akpa ru e nga ni e migha odalo oyi Onomhue ni o mhue eke agbo.‡

† 10:10 Li ze Ezik 2.8–3.3

* 11:1 Li ze Ezik 40.3; iZaka 2.1-2

† 11:2 Li ze iLuk 21.24 ‡ 11:4 Li ze iZaka 4.3,11-14

⁵ Ini oḡbòkhòghuo oḡ dua ni lḡli kwale wẹ utse, erali e rḡte wẹ unu fiẹ ya toṣe eni ebe wẹ-a. Ina ebe wẹ ni e nono ni e kwale wẹ utse e mema li ya ghua.

⁶ E mhḡli afu ni e rḡ pfi okpẹ ukhui ini amẹ o khi ruẹ eḡheḡhe ni e rḡ da mẹ guele ne. E gbo mhḡli afu ni e rḡ mu amẹ okẹ mele oḡia-a. E gbo ku ighuamhi khi ighuamhi she ekẹ abi o li ghḡle wẹ shi. §

⁷ Ini e da pfi o oṣeḡe se ne, inyagbemhi ni o ya rḡte ilimhi na ningḡḡ lasele o ya tsua mu wẹ, o mu wẹ o le, o gbolo wẹ-a.*

⁸ Ilimhi eyewẹ e ya de yeṣhi ifui eoli ni o funẹ ashini a la gbe Onomhuẹ oyewẹ-a shi apfida. Irokhòkhò iSodomu ali ijipiti eoli ona o khi. †

⁹ Oḡbeḡe ese ali ukhukui, eḡbḡ na agbḡ nya ali eḡeli ali emuẹ ali ushishi e ya ke nise uruli bino ilimhi eyewẹ, eḡa lama rewe to.

¹⁰ Eḡbḡ na ekẹ agbḡ e ya ke gheḡe shi eghuli ni e ghu, eḡ bḡla, e de isomhopfa a ghi eḡbewẹ, irari khi emeḡguele aava eḡhḡ, e she nase eḡbḡ ni e la ekẹ agbḡ khue.

¹¹ Ama abi eḡe ese ali ukhukhui e rḡ doṣe, Ayemhe oyi Eshineḡba ni mhḡli agbḡ o lo wẹ eḡbe, e vule migha. Ulishi oniemhi o lo eḡbḡ ni e mẹ wẹ eḡbe. ‡

¹² Ighḡ e suḡ uruli na leghe o rḡte idane ngme. Oḡ wẹ, “Nḡale odane oola.” Ighḡ e li nga idane elemhi otughunu. Ebe wẹ e leṣe fe kpee. §

¹³ Oni eḡheḡhe a mẹ ukpokpomhi inighise ekẹ ni o ku ekẹ asheghuo akemhishi igbe oyi oni eoli luẹ.

§ **11:6** Li ze 1 Ighie 17.1; Okiali 7.17-19; 1 iSam 4.8 * **11:7** Li ze iDan 7.7,21; Iro 13.5-7; 17.8 † **11:8** Li ze Aza 1.9-10 ‡ **11:11** Li ze Ezik 37.10 § **11:12** Li ze 2 Ighie 2.11

Ègbò agbẹlẹ oshilua, 7,000, e ghuloa, ulishi o mu ègbò ni e kpọle, e kuẹghie Èshinẹgba ni o la iloghie.

¹⁴ Opfuse onuzi-eva o she dọsẹ, opfuse onuzi-esẹ o keḽe ya bhale.

Akala onuzi-ishilua

¹⁵ Igho aḡeni Ọnuzi-osshilua o pfi akala oyọli, igho ikpokpo iruli e la idane ngme. Ee liẹ,

“Eghiele agbò o she mele
eghiele oyi Ọnọmhue oyawa-a,
ali onayi iKirisiti oyọli-a.

Ọ ya mhẹsẹ ke le agbòagbò.”*

¹⁶ Egbhali uye ali aane ni e shito ukpẹkhomhi oyewẹ odalo Èshinẹgba, e de ya ta alo mu ekẹ ga Èshinẹgba.

¹⁷ Ee liẹ,

“Anye ri ikphẹmhi nẹ,
Èshinẹgba Ọnọmhue Nofunẹ nya,
Ọni ọ khi lọli, ọni ọ kpẹ khi lọli,
irari khi u she rue
ekpabọ eniẹmhi eye,
u she ẹ mhẹsẹ.

¹⁸ Abi elemhi e rọ bi ishishi,
yeyẹ u li mhọli ofu.†

Èghẹghẹ o she ramhi
ni u rọ ya guẹ eni eghua ẹzo,
ni u rọ ya ri eleli na eni ẹẹ ga eye
ni e khi emekeḡuele,
ali eni Èshinẹgba ọ she pfa na
ni e ri ekpẹ na eva oyẹ,
ghe ẹgbò ni ẹa mu ẹloe

* **11:15** Li zẹ *Okiali 15.18; iDan 2.44; 7.14,27* † **11:18** Li zẹ *Iwolo 2.5; 110.5; 115.13*

ali ekhemhue,
abi u li pfuse eni e pfuse eke agbo-a.”

¹⁹ Igho a li khueghie Owa ugamhi oyi Eshinegba na iloghie-a, a me Akpati Ishobo agho. Igho inyamhisalo ali ukpimhi ali ingmolo ali ikphala, eke e de kulu, eche rote idane deno kule.‡

12

Oni Okpotso ali Oligio oniemhi

¹ Ukpokpomhi irokhase onyaloa o feli shi idane: Okpotso o ya lao ni itsua ni o so e khi ovo, uki o kpoke awe eyoli, arula oghie oyi ikpetata igbeva o rughu oli ukhomhi.

² Oo me. O tseshe leghe elemhi otomhe abi o ro ya bia.

³ Igho emhi olese o gbo feli shi idane, ukpokpomhi Oligio oniemhi oyile ni o ze ikhomhi ishilua ali ekphali igbe, ali o rughu irula oghie ishilua shi ukhomhi.*

⁴ O ri ughia oyoli fuomhi asheghuo akemhishi ese ikpetata ni e la ukhuli pfino kule eke agbo. Oni Oligio oniemhi o migha oni okpotso ni oku o to egho odalo, ni o ba me asha gbe oli oni omoo ogho le, ini a lese bia li lasele.†

⁵ Oni okpotso o bia omose ni o ya ri otsoodu akhuli mheshe na egbo ni e la eke agbo nya. Ama a ba oni omoo eke rue ya nga idane ghi Eshinegba ali ukpekhomhi eghiele oyoli.‡

‡ 11:19 Li ze Iro 8.5; 16.18,21 * 12:3 Li ze iDan 7.7 † 12:4 Li ze iDan 8.10 ‡ 12:5 Li ze Aza 66.7; Iwolo 2.9

⁶ Oni ọkpotso, ọ na je ọdagbe ifufu asha ni Eshinẹgba o riẹle shi eke khe ọli ni a la ya dua li egbe ogbele agbele ali egbhuegbese (1,260.)

⁷ Igho okhọli o lasese shi obini iloghie, iMakięni ali igęni eyọli, e nu oni inyagbemhi i khọli. Oni Oligio ọnięmhi ali igęni eyọli e mie we abo oni okhọli. §

⁸ Ama ọa mhue ekpabo te iMakeni ali igęni eyọli oni okhọli. Ashini a kpe ro na we obini iloghie o de we obo-a.

⁹ A pfi oni ukpokpomhi oni Oligio ọnięmhi ọgho tiemhile eke agbo, oni ęnye ọneđe ọgho ni a lu Etse ali Okphaghie, oni o di agbo nya ya da ode, a pfi oli tiemhile eke agbo, a li pfi igęni eyọli li tiemhile.*

¹⁰ Igho mhi suo ukpokpomhi uruli obini iloghie khi ọọ li,

“Mena, imiepfuese
ali ekpabo ali
Eghiele oyi Eshinẹgba oyawa
e she bhale!
IKirisiti oyọli ni o ze
o she ri afu oyọli khase.
Irari khi Okphaghie,
ni o gue ezọ o shi
inyoghwo awa egbe,
odalo oyi Eshinẹgba
ghe ele ọguota ghe ele-iyose,
a she pfi ọli tiemhile.†

¹¹ E gbe ọli mu ọli le,
itobo ọlia eyi oni Omi Osumha

§ 12:7 Li ze iDan 10.13,21; 12.1; iJu 9 * 12:9 Li ze Igbae 3.1; iLuk 10.18 † 12:10 Li ze iJobu 1.9-11; iZaka 3.1

ali ingmemhi ọtsele oyewe.
 Ea ligho nono ingme agbo oyewe,
 ni o rewe ya ke
 ti je ukhokho na eghuli.

¹² Irarigho, a ke ghele,
 ee iloghie ali egbo
 ni e la elemhi oli.

Ama epfua o khi na
 e eke ali oke oniemi,
 irari khi Okphaghie
 o she ri ofu tiemhie deba e!
 Ofu o she vo li elemhi,
 irari khi o lese khi
 ukuku eghenge o ke mholi.”

¹³ Abi oni Oligio oniemi o ro me khi a she pfi
 lue tiemhile eke, o khu oni okpotso ni o bia oni omo
 omose.

¹⁴ Ama a ri ipfua eva eyi akpa odegbe oniemi na
 li, ni o ro fiala je odagbe ifufu. Ikhi obini a ri ele
 shi eke khe oli ni a la ya ri eloe khu oli, eghenge ali
 ighege ali ukhukhui eghenge ni o khi ikpe ese ali
 ukhukhui, ini oni inyagbemhi o khi ri emhi li o.†

¹⁵ Oni Oligio oniemi o rote unu ku amese lasele abi
 oke ni oo tu, ro khu oni okpotso ni o ba ri ochikpho
 fuomhi oli ya gbe.

¹⁶ Ama eke o kpaghie oni okpotso obo irari khi
 eke o nya unu-a ri oni oke da ni oni Oligio oniemi
 o rote unu kpa ku le.

¹⁷ Igho oni inyagbemhi o pfaa deba oni okpotso, o
 ya mu okholi vule shi imi oli enekpole o, ikhi eni e
 ri Omhesese eyi Eshinegba gbe akanya, ni e ri igesikia
 mu ọtsele oyi iJesu.

† 12:14 Li ze iDan 7.25; 12.7

18 Igho oni Oligio oniemhi o migha egele oke oniemhi.

13

Oni Inyagbemhi ni o rote oke oniemhi lasele

¹ Mhi me inyagbemhi khi o rote elemhi oke oniemhi ngale. O ze ekphe igbe ali ikhomhi ishilua, o rughu irula oghie igbe shi eni ekphali. Ukhomhi ogbogbo a keke eva ni o khi ungmehi ipfiunu-a shi.*

² Oni inyagbemhi ni mhi me, o li abi ekpe, awe eyoli e li abi eyi akpogene, unu oyoli o li abi unu odumhi. Oni oligio oniemhi o ri afu na oni inyagbemhi ni o ro mholi ekpabo ro ke mheshe abi oghie.†

³ A kuale oni inyagbemhi ukpokpomhi utse ni o ge ugboko oniemhi. Ama oni ugboko ogho o bie. O ri abo sha agbo nya, e ve deba li.

⁴ Egbọ ee ga oni Oligio oniemhi irari khi o she ri afu na oni elamhako, egbo e li ga oni elamhako, e lie, “Oghuo o li abi oni inyagbemhi!” “Oghuo o dobe ya nu oni inyagbemhi kholi?”

⁵ A ri unu na oni elamhako ni o ro ngme ingmemhi emuebe ali ipfiunu-a. A ri eghenge na li ni o ro ri afu oyoli gbe akanya iki egbhueva ali eva.

⁶ O khueghie unu-a, o ngme ipfiunu-a deba Eshinegba, ro pfueche eva oyi Eshinegba ali ashini o o la ali egbo ni e nu oli la iloghie-a.‡

⁷ A ri afu na li ni o nu eni Eshinegba o she pfa na kholi, ali ni o mu we o le. A ri afu na li ni o mheshe shi edeli nya, egbo ali emue ododa ali ishishi.§

* **13:1** Li ze iDan 7.3; Iro 17.3,7-12 † **13:2** Li ze iDan 7.4-6 ‡ **13:6** Li ze iDan 7.8,25; 11.36 § **13:7** Li ze iDan 7.21

⁸ Ẹgbọ ni e la eke agbọ nya e ya ke ga ọni inyagbemhi. Eni ẹa ga ọni inyagbemhi ọna, e khi eni a keke eva oyewe shi ebe ni a keke eva oyi eni e ya mholi agbọ na agbọagbọ shi, neni a ma agbọ. Oni ebe agbọ ona o khi ebe agbọ oyi Omi Osumha ni a ro luase obo.*

⁹ Ọni o mholi esọ, o ro suo!

¹⁰ Eni okholi o ya mu,
o mema ya mu we.

Eni a ya gbolo-a,
a mema ri itakobi
ya gbolo we-a.

Eri a ri ona liẹ eni Ẹshinegba o pfa na e ri irabomudu ri egbe mie, e ri igesikia ke khasẹ.†

Oni Inyagbemhi ni o rote agbọ lasele

¹¹ Igho mhi gbo me inyagbemhi olese ni o rote eke e lasele. O ze ekphali eva abi omi osumha, o o ngme abi oligio oniemi.

¹² O ri afu oyi inyagbemhi oni odode e gbe akanya na li. O ri itoto ri egbọ na eke agbọ o ga inyagbemhi onodode, ikhi oni ukpokpomhi ugboko oyoli o she bie.

¹³ O riẹle iroḱhasẹ onyaloa enefunẹ, o ga ri erali rote idane e tiemhile, ni egbọ ee me.

¹⁴ Itobọ iroḱhasẹ ni a ri afu oyi inyagbemhi onodode lina a riẹle, o di egbọ ni e la eke agbọ. O gueye we e khali ikhumhi, ro khi ufumhi na oni inyagbemhi ni oni itakobi o kualii utse, ni o kie la agbọ.

* **13:8** Li ze *Iwolo* 69.28 † **13:10** Li ze *ijere* 15.2; 43.11

15 A ri afu na li ni o ri ayemhe na oni ikhumhi irokhokho oyi oni inyagbemhi onodode, ni o dobe ke ngme, ali ni a ke gbolo egbo ni ea lama ga li-a.

16 O gbo ri itoto mu ogbokpa shi olole shi obita okekhi alukpo, ghe egbo eniemhi ali enikeke, ghe eni e mholi epfue ali eni ea mholi, ghe eni ea khi ighumha ali eni e khi ighumha.

17 Ogbokhoghuo oa dobe ke e de emhikhoghuo wekhi eri o ro o de, se ni oni o mholi olole ogho, ni o khi eva oyi oni inyagbemhi ali inoba oyi eva oyoli.

18 Eri onana gueye awa, awa mholi ileasingme. Oni o lolo lese ingme o sa abi a ri oni inoba ona ngme. Oni inoba khi (666), egbhue uye ali igbe ali egbhuese ikpamhi esesa. Inoba ni o migha shi ogbo na.

14

Oni Omi Osumha ali eni egbo agbele egbhueshilua ali ene (144,000)

¹ Igho mhi bino. Ghe Omi Osumha odalo oyemhe khi o migha Ute iZayo. Egbo 144,000 (agbele egbhueshilua ali ene) ni a keke eva oyoli ali eva oyi itali shi we alukpo e nu oli migha.*

² Mhi ya rote idane suo uruli abi ikhoshe oyi utumhi oyi oko nofuno ni o rote ikhomhi eche tu e tiemhile. Oo ngmolo abi akphala. Oni uruli ni mhi suo, o li abi ini eni e kpheli efa, ee kpheli efa.

³ E to uwolo onogbo odalo ukpekhomhi oghie ali ukpeloe oyi eni elamhako aane ni Eshinegba o ma ali ukpeloe oyi eni egbhali. Ogbokhoghuo oa dobe wena oni uwolo ogho, se ni egbo agbele

* 14:1 Li ze Ezik 9.4; Iro 7.3

egbhueshilua ali ene egbo (144,000), ni a she rote eke agbo pfasheke.

⁴ Enana e khi egbo ni ɛa ri ikpotso ri ichimhi mu egbewe, irari khi eri e ri egbewe shi ipfuase. E deba oni Omi Osumha a je obiobini o je kpa. Eni a rote ifuabo egbo pfasheke e khi ni a rote odode ro na Eshinegba ali oni Omi Osumha pfo.

⁵ Ogbo oa me egbholi okhoghuo unu oyewe, irari khi ɛa mholi umhagueli okhoghuo.†

Eni Igeni Aase

⁶ Igho mhi me ageni olese khi o la iteva irarogbe e fiala, o mhue usomhi onete na agboagbo ni o ro ya tsabo gueye egbo na agbo, ikhi eni e la ishishi nya, ali edeli nya, ali emue-khi-emue ali egbo kpa.

⁷ O ri ukpokpomhi uruli lie, “Na ulishi Eshinegba, ri ufumhi nali, irari khi egheghe iguezo oyoli o she ramhi, a ke ga oni o ma idane ali eke ni o ma oke oniemhi ali ashini amɛ o te e chocho.”

⁸ Ageni olese onuzava o deba li, oo, “IBabilo okekhui o de, oni o ri onyo ni oa pfuase oyoli ona okia na ishishi nya da.”‡

⁹ Ageni onuzi-aase o deba we, o ri ukpokpomhi uruli lie, “Ini ogbokhoghuo o ga oni inyagbemhi ali ikhumhi oyoli, ni o ro mie olele oyoli shi alukpo, okekhi obo,

¹⁰ oni ogbo ogho, o ya rote onyo elemhi ibibi oyi Eshinegba li da, ikhi onyo ni aa pfose-a ni a she ku vo uko elemhi ibibi oyoli. A ya ri ofulu ni oo lala biobiobio tose oli-a ukpeloe oyi igeni eni e pfuase ali ukpeloe oyi oni Omi Osumha. §

† 14:5 Li ze iZef 3.13 ‡ 14:8 Li ze Aza 21.9; ijere 51.8; Iro 18.2

§ 14:10 Li ze Aza 51.17; Igbae 19.24; Ezik 38.22

11 Ewoli oyi anasemhe eyewe ee nga idane agboagbo. Eni e ga oni inyagbemhi ali inyagbemhi ni a khali, ali onini o da mie olole oyi eva eyoli ne, eamhue iyemhe shi elooguota, shi eliyose.”*

12 Eri onana o gueye eni Eshinegba o pfa na e ri irabomudu ri egbe mie, ikhi eni e ri omhese eyi Eshinegba a gbe akanya, ni e ri igesikia a deba iJesu.

13 Igho mhi suo khi uruli o rote idane lie, “Keke onana: Ikhivose o khi na eni e ghu-a shi elemhi Onomhue rote memena vu.”

“Ikhivose o khi na we egbegbo!” “Igho Ayemhe o ngme, khi e ya yemhe inyama-egbe agbo-a, irari khi eminete ni e ri ele, e ya deba we!”

Ikhiese oyi eke agbo

14 Igho mhi bino, mhi me otughunu opfopfo odalo oyemhe. Oni o shito o, “O li abi Omi Ogb.” O rughu arula igolu oyi oghie shi ukhomhi, o ri agaga ni oo mu mholi obo.†

15 Ageni olese o rote Owa oyi Eshinegba laseli ri ukpokpomhi uruli lu oni o shito nga ukhomhi otughunu egho leghe, oo li, “Rue agaga oye ni u ke khiese, irari khi eghenge ikhiese o she ramhi, irari khi agbo o she bie ni a khiese.”‡

16 Igho oni o shito otughunu egho, o ri agaga oyoli khiese agbo.

17 Ageni olese o rote Owa oyi Eshinegba na iloghie fie laseli, loli o li mholi agaga ni oo mu.

18 Igho agen olese o rote atete fie laseli, ikhi agen ni o mholi omhese shi erali. O ri uruli oniemhi lu oni o mholi agaga ni oo mu egho leghe,

* 14:11 Li ze Aza 34.10 † 14:14 Li ze iDan 7.13 ‡ 14:15 Li ze iJofe 3.13

o o li, “Rue agaga oni o o mu oye, ni u ro khiese ipfonu eke agbo-a, irari khi ipfonu e she yile!”

¹⁹ Igho oni ageni o pfi agaga oyoli gashe eke agbo, o khiese ipfonu nya, o ku we lo ashini a te e mino onyo. Amino onyo ona, elemhi ibibi oyi Eshinegba o migha shi.

²⁰ Igho a la ashini a la amino onyo ni o la olase oni eoli ri awe gue we. O lia e rote oni amino onyo tu lasese. Utumhi oyi oni o lia o ga nuata ramhi imali egbhuegbe, e limhi abi ete-awe ishe. §

15

Igeni oshilua ni e tsua anasemhe ishilua

¹ Igho, mhi me irokhase oniemhi ni o mu eloe olese ukhomhi idane, ikhi igeni oshilua ni e mholi anasemhe ishilua ni e khi eni e kpukhokho, irari khi wewe Eshinegba o ro ya gbe ofu oyoli ukhomhi.

² Mhi me emini o li abi oke ighegbe oniemhi ni erali e soloshi, o migha epfe oke oniemhi. Egboni e mu oni inyagbemhi ali oni ikhumhi oyoli ali inoba oyi eva oyoli o le, e mu efa ni Eshinegba o ro na we mhue abo.

³ E to uwolo oyi iMosisi oni o o ga oyi Eshinegba ali uwolo oyi oni Omi Osumha, e lie,

“Ufumhi ali oshabo
e khi ikanya eye,
Eshinegba Onomhue Nofune nya.
Ipfuase ali igesikia
ode eye e khi,
oghie ni o mholi ishishi nya!*

§ 14:20 Li ze Aza 63.3; iLame 1.15; Iro 19.15 * 15:3 Li ze Okiali 15.1

4 Oghuo oya ya na
 ulishi oye Onomhue,
 ni oya ya ri ufumhi
 bhale ghi eva oye?
 Irari khi yeyeghuo kpele
 u khi oni o pfuase.
 Ishishi nya e ya bhale
 ya kueghie e, irari khi
 ikanya ipfuase eye
 e she ri egbe khase.”†

5 Onana o dose se, mhi bino, mhi me Owa oyi
 Eshinegba na iloghie, ni o khi Igholo oyi otsese khi o
 khueghie-a.‡

6 Rote oni owa ugamhi, eni igeni oshilua ni e
 mholi anasemhe ishilua e te lasele. E sono itsua ni
 e pfuase ni ee ge nyanyanya, e ri ogbene igolu mu
 aye.

7 Igho otuoghuo eni elamhako aane ni e mholi
 ayemhe egho, e ri italabi igolu ishilua ni ofu oyi
 Eshinegba e la, na eni igeni oshilua. Ikhi Eshinegba,
 ni o lao le agboagbo.

8 Oni owa ugamhi o vo ewoli oyi ufumhi ali
 ekpabo oyi Eshinegba. Ogbogbo oghoghuo oya la o ni o
 dobe lo oni owa ugamhi ya ramhi ni eni anasemhe
 ishilua e ro gba pfo.§

16

Italabi ishilua ofu eyi Eshinegba

1 Igho mhi suo khi uruli na leghe o rote oni Owa
 ugamhi oyi Eshinegba gueye eni igeni oshilua, “A ka

† 15:4 Li ze ijere 10.7; Iwolo 86.9 ‡ 15:5 Li ze Okiali 38.21 § 15:8
 Li ze Okiali 40.34; 1 Ighie 8.10-11; 2 Okhe 5.13-14; Aza 6.4

ku eni italabi ishilua eyi ofu oyi Eshinegba shi eke agbo.”

² Aḡeni ɔnodode ɔ vu ya ku atalabi oyoli shi eke agbo. Iwali igboko ebe ni e lolo e to, e ge eḡbo ni e mholi oḡe oyi ɔni inyagbemhi, ni e ga ɔni inyagbemhi ni a khali.*

³ Aḡeni ɔnuzava ɔ ya ku atalabi oyoli lo oke oniemi, oni oke oniemi o mele oḡia eyi eḡbo ni e ghua-a. Emhikpa ni e mholi ayemhe ni e la elemhi oni oke oniemi e ghuloa.

⁴ Aḡeni ɔnuzi-aase, ɔ ku atalabi oyoli lo oke ali ichocho amē, e mele oḡia-a.†

⁵ Mhi suo khi aḡeni ni a ri amē nga obo khi ɔo li,
“Oḡeḡe-ḡe ni ɔ pfuase

u khi, irari khi

u ḡe so ingme ena,

Yeḡe u khi Eshinegba No pfuase,

Yeḡe u la ɔ memena,

ni u kpe la ɔ, ni u gbo ya la ɔ,

itobḡo khi igesikia u ro ɔ so ezo eye.

⁶ Irari khi eḡbo e she gbolo

eni a pfa na-a

ali emekeḡuele,

u she ri oḡia na we da,

abi o ti shi!”

⁷ Mhi suo khi atete o tseḡe, ɔo,

“ḡeḡeḡeḡe,

Eshinegba Onomhwe Nofune nya,

igewezo eye, eyi igesikia

ali eni e te ode e khi!”

* 16:2 Li ze Okiali 9.10 † 16:4 Li ze Okiali 7.17-21; Iwolo 78.44

⁸ Ageni onuzi-aane o ku atalabi oyoli ku ovo, a ri ekpabo na ovo o ri erali ke tose egbo-a.

⁹ Egbo e daghie-a irari utomhi oyi erali, e ze emuebe na eva oyi Eshinegba ni o mholi ekpabo ro mhese na anasemhe enana, ama ea lama mupfi ni e ri ufumhi na eva oyoli.

¹⁰ Ageni onuzi-oshe o ku atalabi oyoli kushi ukpekhomhi oghie oyi oni inyagbemhi, eghiele oyoli o la obili. Egbo e ngomhi elemhi unu, shi oya.‡

¹¹ E ku itse na Eshinegba na iloghie irari utomhi ali igboko eyewe, ama ea lama mupfi lase ode okholo oyewe le.

¹² Ageni onuzi-osasa o ku atalabi oyoli lo oke iYufiretisi ni o fu, o khakha amea ni ighie na obini ovo o te e ngale e me asha rote dose.‡

¹³ Igho mhi me khi ikhiakhiamhi iyemhe aase ni e li abi ikele e rote unu oyi oni oligio oniemhi ali unu oyi inyagbemhi ali unu oyi omekeguele oyi egbholi, lasele.

¹⁴ Wewe e khi iyemhe okphaghie ni ee gbe ikanya oshabo, ni e fie deba ighie ni e la eke agbo nya, ni e ya ti we gbili shi okholi ogbele oyi Eshinegba No fune nya.

¹⁵ “A ghe i, mhi ya bhale abi oghiatu! Ikhivose o khi na ogbo ni o ya guale, ni o ya ri eloe khu ide eyoli ini o khi banu-a ni a me oli irumheba!”*

¹⁶ Igho eni iyemhe okphaghie e ti we gbili ashini a ri elemhi Iburu e lui Amagedo.†

‡ 16:10 Li ze Okiali 10.21 § 16:12 Li ze Aza 11.15 * 16:15 Li ze iMat 24.43-44; iLuk 12.39-40; Iro 3.3 † 16:16 Li ze 2 Ighie 23.29; iZaka 12.11

17 Aḡeni ɔnuzi-oshilua o ku atalabi oyoli nga idane, igho uruli na leghe o roṭe Owa ugamhi oyi Eshineḡba roṭe ukpekhomhi eghiele ngme lasese, ɔo li, “A she riṣe ɔli!”

18 Igho, inyamhisalo ame, ali ukpimhi ali ingmolo oyi ikphala ali inighise eke ee bhale. Inighise nabi ɔgbɔ-a kpe me ghue abi a te ma ɔgbɔ shi eke agbɔ. Oni inighise o ga khi oniemi!‡

19 Oni ɔoli oniemi o kemhi asha ese, ɔoli oyi eni ishishi nya e de kua. Eshineḡba ɔ sato ɔoli iBabilo no fu egbe. O mheshe uko ni onyo ofu oyoli o vo nali.§

20 Eke ni e la iteva elemhi oke nya e kelea, aa ke me ite ekhoghuo.*

21 Eche ame na idane eniemi e roṭe idane de mu egbo. Ee ngmano ku Eshineḡba irari eni opfuse oyi eni eche ame, irari khi oni opfuse o kholo gba.†

17

Adegbe nofunu

1 Igho aḡeni oghuo ni o mholi italabi ishilua o bhale, ɔo mhe, “Bhale khi mhi ya ri abi a li ya nase oni adegbe onofunu khase, ikhi ɔoli oniemi ni o la epfe oke ni e bu.*

2 Lolli ighie na eke agbo e nu kia okia, onyo okia eyoli e gbe egbo ni e la eke agbo.”†

‡ 16:18 Li ze Iro 8.5; 11.13,19 § 16:19 Li ze Aza 51.17 * 16:20
 Li ze Iro 6.14 † 16:21 Li ze Okiali 9.23; Iro 11.19 * 17:1 Li ze
 ijere 51.13 † 17:2 Li ze Aza 23.17; ijere 51.7

³ Igho oni ageni o rue mhe je odagbe ifufu elemhi Ayemhe. Igho mhi me okpotso ni o shito nga inyagbemhi oyile, ni o le iwali eva ipfiunu-a, o ze ikhomhi ishilua ali ekphali igbe.‡

⁴ Oni okpotso o sono itsua eyile, a ga mema ri igolu ali ifefe ali ema ro khuese oli-a. O mu uko igolu mholi obo ni o vo emhi ighuighue ali ikanya ichimhi eyi itsebo eyoli.§

⁵ Emhi osheli na keke shi oli alukpo khi.

Osheli.

IBabilo Oniemhi.

Inyo idegbe nya.

Ali inyo itsebo nya.

⁶ Mhi me khi oni okpotso, o da oia eyi egbo ni a pfa na, oia eyi eni a gbe-a irari khi e mie ifesu suo.

Abi mhi ro me oli, mhi yila.

⁷ Igho oni ageni oo mhe, "Elo o ze ni u ro yila? Mhi ya gueye osheli oyi oni okpotso ali oyi oni inyagbemhi ni oo nga, ni o ze ikhomhi ishilua ali ekphali igbe.

⁸ Oni inyagbemhi ni u me ni o kpe khi, mena ni oa ke khi loli, o ya rote ilimhi na ningolo ngale ya je epfua oyoli. Abo e ya sha egbo ni e la agbo ni aa keke eva oyewe shi ebe ni a keke eva oyi eni e ya mholi agbo na agboagbo shi, rote igbaekele agbo, ini e me oni inyagbemhi irari khi, o kpe khi, mena oa ke khi, ni oa ya bhale.*

⁹ "Onana o khi emini ogbo te e sa usamhi ileasingme. Eni ikhomhi ishilua egho, e khi ikhomhi ite ishilua ni oni okpotso oo shito.

‡ 17:3 Li ze Iro 13.1 § 17:4 Li ze ifere 51.7 * 17:8 Li ze iDan 7.7; Iro 11.7; Iwolo 69.28

10 Ighie oshilua e li gbo khi. Etuoshe o, e she ghua, oghuo o o kiele e mhesẹ, oni o kpole o a bhale ne. Ini o da bhale, o mema ya la o ukuku eghẹghẹ.

11 Oni inyagbemhi ni o kpẹ la o ni o a ke la o egho, o khi oghie onu-olale, abeghuo lo li ali oshilua enekpole e li, o ya li je epfua oyoli.

12 “Eni ekphali igbe ni u me egho, e khi ighie ogbe ni aa ri eghiele na ne, ama a ya ri afu na we elemhi iwakati oghuo tse ni e ro mhesẹ abi ighie, li shi oni inyagbemhi.†

13 Enana emhi oghuo e khi, e ya ri ekpabo ali afu oyewe na oni inyagbemhi.

14 E ya nu oni Omi Osumha kholi. Oni Omi Osumha o ya gbe we oni okholi, irari khi Onomhue oyi enemhue o khi, ali Oghie ni o mholi ighie o khi. Irari khi e nu oli la, we we o lu ni o ze, ali ni e khi eni e ri igesikia deba li.”

15 Igho oni agheni o o me, “Eni okẹ eniemhi ni u me, ni oni adegbe o shito, egho ali ebubu egho ali ishishi ali emue ododa e la agho.

16 Oni inyagbemhi ali ekphali igbe ni u me egho e ya biselemhi oni adegbe. E pfuse oli-a, e ban o oli-a, e nyan o li elamhi egbe ro le, e ri erali tose oli-a.

17 Irari khi Eshinegba o roli shi we udu e riele emini o gba, lo li e ro lama kugbe ri ekpabo eyewe na oni inyagbemhi ni o mhesẹ, ya ramhi ni ungemhi oyi Eshinegba o ro bhale ya tse.

18 Oni okpotso ni u me lo li o khi oni eoli oniemhi ni o o mhesẹ na ighie na agbo.”

18

† 17:12 Li ze iDan 7.24

Udemhi oyi iBabilo

¹ Onana o dọse se, mhi me aḡeni olese khi o rọte iloghie e tiemhile. O mhọli afu nofunẹ, ugẹmhi oyọli o ri eke agbo o ge nyanyanya.

² O ri uruli oniẹmhi tseşe leghe, o li.

“Eoli iBabilo Oniẹmhi,
o she de.

O she mele ugbebo
oyi iyemhe eyi
okphaghie-a,
ali ashini iyemhe
okphaghie e la lese,
ashini ipfeli ali elamhako
ni aa pfuase ni aa ghue,
e la.*

³ Irari khi ishishi nya,
e she kpokpo onyo,
ni o ri ujili e kpha,
ikhi onyo okia oyoli.
Ighie na eke agbo
e she kia okia deba li.
Eduoki na eke agbo,
e she rọte
iliagbo-tsuakua oyoli
mhue epfue.”†

⁴ Igho mhi suo uruli olese ni o rọte idane lie,
“Egbo eyemhe, a na li egbe kua,
ini a khi mhue okemhi
shi olamhe eyoli,
ini a khi mhue okemhi
shi osoli anasemhe oyoli.‡

* **18:2** Li ze Aza 13.21; 21.9; iJere 50.39; 51.8; Iro 14.8 † **18:3** Li ze Aza 23.17; iJere 51.7 ‡ **18:4** Li ze Aza 48.20; iJere 50.8; 51.6,45

5 Irari khi olamhe eyoli
 e she tigbili yagha ramhi idane,
 Eshinegba o she sato
 umha-gueḷi eyoli. §

6 Ā li ọli, abi o li e,
 ā fali ọli ota asha eva
 shi ikanya ni o gbe.
 Onyo ni o toto ni o ro na e da,
 a so oghoghona nali da asha eva.*

7 A ri osoli ali oyala nali
 ni o gue to ufumhi ali epfue
 ni o rona egboli.

Irari khi eri Oni Okpotso
 o la ekelemhi tono obo udu lie,
 'Mhemhe mhi khi oni olele!
 Mhi aa tigbe ya khi
 osamhi-olimhi,
 mhi aa tigbe ya
 me oya egbe ghue.'

8 Irarigho, ogbeleghuo
 anasemhe oyoli
 o ro ya sha rughu ọli,
 shi eghuli ali evie
 ali okiamhi.

A ya ri erali tose ọli-a.
 Irari khi Eshinegba Onomhue
 ni o ya gue ọli ezo,
 onofune nya o khi." †

§ 18:5 Li ze Igbae 18.20-21; ijere 51.9
 ijere 50.29 † 18:8 Li ze Aza 47.7-9

* 18:6 Li ze Iwolo 137.8;

9 “Ini ighie na agbọ ni e kia okia deba li, ni e nu ọli li agbọ tsua kua, e ya viẹ, e viẹ eviẹ oya na li, ini e mẹ ewọli erali ni eẹ toşẹ ọli-a.

10 E ya tapfia migha ke viẹ irari ulishi osoli ni a na li, eẹ liẹ,

“ ‘Eekhue o Eekhue o
yeyẹ ẹoli nofunẹ,
iBabilọ ẹoli no mhue ekpabọ!

Elemhi iwakati oghuo tşẹ
epfua oyẹ o she bhale!‡

11 “Eduoki na agbọ e ya viẹ ọli e viẹ oya irari khi ọgbọkhọghuo ọa ke nu wẹ ya dẹ itsua.Ş

12 Itsua igolu ali ẹlomho, imieche ni e somhotse ni e ghalẹ, ifẹfẹ ali ema, ide epfopfo na kpishi, ali eni ẹ yilẹ, ghe ena wọnọ, ali ilọlọ eni eyilẹ ali itsua ọdọda ni a ri ọọra ni ẹ pfie khali, ali itsua ọdọda ni a ri ekphali eni khali, ali ẹra ni e ghalẹ, ide ali ikhuli ali eche imabo.

13 Ali alagho na lu ikinamọni ali oşhamhi ali ituale afu ẹera ali ituale ni a ku ẹ shi olimhi egbe, ali atike ni ọọ pfie ni o ghalẹ ali onyọ ali oili ali ifulawa ali ikpamhi emhi ni a lu ado, ena ali isumha ali ichi ali amọku ni ichi eẹ tsua, li shi ẹgbọ ni e khi ighumha.*

14 “Eni eduoki e ya liẹ ọli, ‘Imọmhi ni u ri ukpẹloe shi ekẹ ẹ kẹ, o she mẹ na. Ẹpfue ali ọsuemhẹ eye nya e she kele-a, ni a ke dobe gbolo mẹ ya mie.’

15 Eduoki ni e ri emhi enana dẹ ni e mẹ elele ẹpfue rọte obọ oyi ọni ọkpotso, e ya migha tapfia, ulishi osoli ni ọ mẹ ọọ mu wẹ. E ya viẹ e viẹ oya,†

‡ 18:10 Li zẹ Ezik 26.16-17 Ş 18:11 Li zẹ Ezik 27.31,36 * 18:13
Li zẹ Ezik 27.12,13,22 † 18:15 Li zẹ Ezik 27.31,36

16 e viẹ nyogho, ee liẹ,
 “Eekhue-o! Eekhue-o,
 ẹoli Onofunẹ,
 ni a ri iwulu ichẹ eneyilẹ,
 ni a ri igolu ali echẹ
 ni e ghalẹ ali ifẹfẹ
 khuẹ akhuẹ!

17 Aboriẹkhi ighọ,
 elemhi iwakati oghuo tşẹ,
 eni ẹpfue oniẹmhi eghọ
 e li opfu-a.’‡

“Eni e khi ega ọkọ-okẹ oniẹmhi nya ali eni ẹ lo
 ọkọ-okẹ oniẹmhi ya asha ali eni ẹ gua li ali eni e rọte
 okẹ oniẹmhi ẹ mie ifata, e ya tapfia migha.

18 Ini e mẹ ewọli eyi utomhi oyọli, e ya liẹ, ‘Eoli
 okhoghuo o la ọ ni o li abi oni ẹoli oniẹmhi?’§

19 E yalọ ifufu ku ukhomhi, e ri eviẹ ali oya viẹ
 leghe, ee liẹ,*

“Eekhue-o! Eekhue-o,
 yẹyẹ ẹoli oniẹmhi,
 ni eni e mhọli
 ọkọ-okẹ oniẹmhi nya,
 e te mhọli ẹpfue eyẹwẹ
 rọte ọsuemhẹ oyi oni ẹoli!
 Elemhi iwakati oghuo tşẹ
 a rọ pfuse ọli-a.†

20 A ri itobọ li
 ke ghẹlẹ, iloghie,
 A ke ghẹlẹ,
 ẹẹ eni a pfa na

‡ 18:17 Li zẹ *Aza 23.14; Ezik 27.26-30* § 18:18 Li zẹ *Ezik 27.32*

* 18:19 Li zẹ *Ezik 27.30-34* † 18:19 Li zẹ *Ezik 27.30-34*

ali ighiusomhi na keḱ ali emekeḱuele!
 Irari khi Eshineḱgba
 ọ she gue ọli ẹzo
 shi abi ọ li nase ẹ.' "‡

21 Igho aḱeni nofunẹ o rue udumhi ẹche ni o li abi
 ẹche iko pfilo oni oke oniemi, ọọ li,
 "Ekpabo na guo
 a ro ya guoḱho
 ẹoli iBabilo oniemi-a,
 aa ke gbo ya
 me ẹ ẹloe ghue. §

22 Ogbọ ọa ke gbo ya suọ
 uruli ẹfa
 weḱhi oyi emini áá kpheli
 weḱhi oyi ofele,
 weḱhi oyi akala
 elemhi yeḱe oni ẹoli ona ghue.
 Ogbọ ọa ke ya me
 ọgbakanya ọkhoghuo
 elemhi ẹ ghue.
 Ogbọ ọa ke ya suọ
 okeke emini a mheḱi iko,
 elemhi ẹ ghue.*

23 Erali ákpá ọa ke gbo ya ge
 elemhi ẹ ghue,
 weḱhi eri a ya gbo suọ
 uruli eni ẹ zu ode
 elemhi ẹ ghue.

Eduoki eye e khi
 ẹgbọ eni e funẹ na eke agbo,

‡ 18:20 Li ze iDeut 32.43; iJere 51.48 § 18:21 Li ze iJere 51.63-64;
 Ezik 26.21 * 18:22 Li ze Ezik 26.13; Aza 24.8

u ri ogbho oye

di ishishi nya wasẹ-a.†

24 Elemhi oni ẹoli a me

ọlia eyi emekeguele

ali eyi eni a pfa na,

ali eni a gboloa shi eke agbo nya.”‡

19

Okuekhoogo!

1 Onana o doşe se, mhi suọ uruli ni o li abi okeke oni emhi oyi ebubu ẹgbọ obini iloghie khi oo tsẹşe, oo liẹ,

“Okuekhoogo,

Imiepfuese ali ufumhi

ali ekpabọ khi

eyi Ẹshinẹgba ọyawa.

2 Irari khi iguezọ oyọli

eyi igesikia ali

eni e sheshe e khi.

Ọ she pfa ẹzọ mu

adegbe ọnọfunẹ,

ọni ọ she ri okia eyọli

yese eke agbo-a.

Ẹshinẹgba ọ she ye okhọli

to ọlia eyi eni ẹẹ ga eyọli.”*

3 Ighọ e gbo tsẹşe, e liẹ,

“Okuekhoogo!

Ewọli eyọli e she ẹ nga

idane agbo agbo.”†

† 18:23 Li zẹ iJere 7.34; 25.10

‡ 18:24 Li zẹ iJere 51.49

* 19:2

Li zẹ iDeut 32.43; 2 Ighie 9.7

† 19:3 Li zẹ Aza 34.10

4 Igho egbhali uye ali aane ali elamhako aane, e de yeshi, e ga Eshinegba ni o shito oni ukpekhomhi oghie, e lie,
 “Atse! Okuekhoogo!”

5 Uruli o rote oni ukpekhomhi oghie ngme o o lie,
 “A kuęhie
 Eshinegba oyawa,
 e e ni e e ga eyoli nya,
 e e ni a na ulishi oyoli,
 ghe egbo ni e fu
 ali eni e she!”‡

6 Igho mhi suo uruli ni o li abi uruli oniemhi oyi ebubu egbo ni o li abi ingmolo oyi oke ni o o tu, ni o gbo li abi ingmolo oyi akphala. Ee lie,
 “Okuekhoogo!
 Irari khi Eshinegba
 Onomhue oyawa Nofune nya,
 lo li o le oghie!§

7 Awa ke ghele,
 egbe ke mu awa,
 awa ri ufumhi nali!
 Irari khi izu-ode oyi
 oni Omi Osumha
 o she ramhi,
 omueshi o she mu egbe shi eke.

8 Ode opfopfo
 ni o dala ni o pfuase,
 a ro nali so.”
 (Oni Ode opfopfo, igue ngeli oyi eni a pfa na o migha shi.)

‡ 19:5 Li ze *Iwolo 115.13* § 19:6 Li ze *Ezik 1.24; Iwolo 93.1; 97.1; 99.1*

9 Oni aḡeni ọọ mhe, “Keke khi. ‘Ikhivose o khi na eḡbo ni a lu shi oni ukue aruele oyi izu-ode oyi oni Omi Osumha.’ ” O gbolo e mhe, “Ingmemhi enana, egbegbi ingmemhi eyi Eshineḡba e khi.”*

10 Igho mhi de ya wugha li awe ni mhi ga li. Ama ọọ mhe, “Khi li ghọ! Oni ọọ ga nabi yeye ali onabi inyoghuo e enekpole mhi khi ni e mu otsele oyi iJesu mhue. Ga Eshineḡba! Irari khi otsele oyi iJesu o khi ayemhe imekeguele.”

Oni o nga achi ofpopfo

11 Igho mhi me khi iloghie o khueghie-a mhi me achi ofpopfo. Oni o nga li a lu oze-regbenga ali oni o khi igesikia. Ode ni o a mhue azeba o te e so ezo, ni o te e kholi.†

12 Ikpamhi alo eyoli e li abi elemhi ere. O rughu irula oghie ni e bu. O mholi eva ni a keke shi oli egbe ni oḡbo olese o a lese, se ni loli ghuo kpele.‡

13 O so awulu ni a so oia. Eva ni a lu oli khi, “Ungmemhi oyi Eshineḡba.”

14 Ekholi-okhue ni e la iloghie e deba li kia, e sono itsua efpopfo ni e dala ni e pfuase, e nga ichi efpopfo.

15 Itakobi ni ọọ mu o rote unu oyoli lasele, ni o ro ya kholi eni ishishi. Otsuodu akhuli o ro ya ke mhese na eni ishishi. O ya rote ashini a te e mino-onyo mino onyo lasele, Ikhi onyo no khi ofu oniemi oyi Eshineḡba Nofune nya. §

* **19:9** Li ze iMat 22.2-3 † **19:11** Li ze Ezik 1.1; Iwolo 96.13; Aza 11.4 ‡ **19:12** Li ze iDan 10.6 § **19:15** Li ze Iwolo 2.9; Aza 63.3; iJofe 3.13; Iro 14.20

16 A keke eva, “Oghie Ni o Mholi Ighie, Ali Onomhue Ni o Mholi Ekhemhue,” shi awulu na dogo oyoli ali ukhiowe oyoli.

17 Igho mhi me agheni khi o migha ovo, ni o vie lasele leghe lui ipfeli ni e la irarogbe e fiala, “A bhale a ka legba shi aruele ogbomhi oniemi oyi Eshinegba.

18 Eghenge agho ni a le elamhi idiegbe oyi ighie ali ega ekholi-okhue ni e ri ekholi-okhue e ye okhue, ali elamhi idiegbe eyi egbo nefune, shi elamhi ichi ali eni e nga we, ali elamhi idiegbe egbo nya, shi ighumha ali eni ea khi ighumha ghe egbo enikeke ali egbo oniemi.”*

19 Igho mhi me oni inyagbemhi ali ighie na eke agbo ali ekholi-okhue eyoli khi e lona kugbe, ni e ro nu oni o nga oni achi ali ekholi-okhue eyoli kholi.

20 Ama a mu oni inyagbemhi ma omekeguele oyi egbholi oyoli, oni o ri eva oyoli gbe irokhase onyaloa. Eni irokhase ena o ro di egbo ni e mie eni olele eyi oni inyagbemhi shi egbe, ni e ga irokhokho oyoli ni a khali. Oni inyagbemhi ali oni omekeguele oyi egbholi, a mu we pfilo uyele erali ni ofulu o la to kua yala.†

21 Eni e kpole, a ri itakobi oni o rote unu oyi oni o nga oni achi gbolo we-a. Eni ipfeli nya e ri elamhi idiegbe eyewe le.

20

Ikpe Agbele

* 19:18 Li ze Ezik 39.17-20 † 19:20 Li ze Iro 13.1-18

¹ Igho mhi me khi ageni o rote idane e tiemhile o mu okpe ilimhi na ningolo mholi obo, o tsua ukpokpomhi uweghe.

² O gamhi oni oligio oniemhi rue, ikhi enye onede ogho ni o khi etse ali Okphaghie, o ge oli ikpe agbele oghuo.*

³ O pfi oli lo oni ilimhi na ningolo, o pfi okpe o. O pfi oni ilimhi na ningolo unu ma, ini o khi ke gbo me asha di ishishi egbo, ya ramhi ni eni ikpe agbele e ro ya gba. Ini ona o dose se, a mema ya rue oli obo-a ukuku egheghe.

⁴ Igho mhi me ikpekhomhi ighie. Eni e shito o, e khi eni a ri afu na ni e ri egbo gue ezọ. Igho mhi gbo li me iyemhe eyi egbo ni a kholo ikhomhi o, irari otsela ni e pfi na iJesu ali ungmehi oyi Eshinegba. Eni egbo ena ea ga oni inyagbemhi wekhi irokhokho eyoli, wekhi eri e mie olele oyoli shi atete ukhomhi, wekhi obo. E ya te eghuli guale, e ya nu iKirisiti mhese ikpe agbele.†

⁵ Egbo ni e kpole ni e ghuloa ea ke rote eghuli guale, ramhi ni ikpe agbele egho e ro gba. Onana o khi irote eghuli guale onodode.

⁶ Ikhivose ali ipfuase e khi eyi eni e mholi obo shi iguale onodode onana. Eghuli onuzi-eva oa mholi ekpabo shi egbo eghogho egbe, ama e ya khi ekpodalo-ugamhi eyi Eshinegba ali eyi iKirisiti. E ya nu oli mhese ikpe agbele.

⁷ Ini eni ikpe agbele e gba se, a ya taghie Okphaghie owa ighumha oyoli-a.

⁸ O ya fie lasele ya di egbo ni e la ishishi nya na eke agbo, ikhi egbo ni a lu iGogi ali iMagogi, ni o ro

* **20:2** Li ze Igbae 3.1 † **20:4** Li ze iDan 7.9,22

ti we gbili shi okholi. Eri e bu abi ekhashe ni e la egele oko oniemi.‡

⁹ Igho e to ogholi ya gbe eke agbo khia, e pfi gase apfe eyi egbo eyi Eshinegba, eoli ni o nono egbegbo. Ama erali e rote idane tiemhile ya tose we-a.

¹⁰ Oni etse ni o di we, a mu oli pfilo erali ilimhi iriere ni ofulu o la to kua yala. Ikhi ashini a pfi oni inyagbemhi ali omekeguele oyi egbholi lo. A ya la agho na we osoli agbogbo, no gbe no bi.

A ri eni e ghu-a gue ezọ

¹¹ Igho mhi me ukpokpomhi ukpekhomhi oghie opfopfo ali oni o shito o. Abi o shito egho, eke ali ukhui e kele-a, ea ke me ashikhoghuo la.

¹² Igho mhi me egbo ni e ghuloa, ghe eniemhi, ali enikeke, e migha odalo oni ukpekhomhi oghie. Igho a khueghie ebe ni e bu-a. A gbo khueghie ebe olese-a ni o khi ebe ni a keke eva oyi eni e ya mholi agbo na agbogbo shi. A gue eni e ghu-a ezọ abi ikanya ni e gbe e li, abi a li keke we shi eni ebe.§

¹³ Oko o kpa egbo ni e ghuloa shi o ku lasese. Eghuli, ali ilimhi, e khueghie unu-a kpa egbo ni e la elemhi we ku lasese. A gue ogbogbo nya ezọ abi o li gbe.

¹⁴ Igho a pfi Eghuli, ali ilimhi lo uyele erali. Erali ilimhi iriere onana o khi eghuli onuzi-eva.

¹⁵ Onini eva oyoli o da la oni ebe ni a keke eva oyi eni e ya mholi agbo na agbogbo shi ne, eri a ya pfi oli pfilo oni erali ilimhi iriere.

‡ 20:8 Li ze Ezik 7.2; 38.2,9,15 § 20:12 Li ze iDan 7.9-10

21

IJerusalemu Onogbo

¹ Igho mhi li me iloghie onogbo ali eke agbo onogbo. Iloghie onodode ali eke agbo onodode e she kala-a, igho li khi oke oniemi.*

² Mhi me oni eoli ni o pfuase ikhi oni iJerusalemu onogbo khi o rote idane e tiemhile rote obo oyi Eshinegba, abi omueshi ni a khuese somhotse e ghi odo li.†

³ Igho mhi suo ukpokpomhi uruli khi o rote oni eghiele e lie, “A ghe khe! Eshinegba o ri apfe oyoli tiemhile deba ebo, eri o ke ya nu ebo ngeli kugbe, eni ebo e ya khi ebo eyoli, Eshinegba o ya nu we la kugbe.‡

⁴ O ya shishi we amevie alo-a, eghuli oke ya la, wekhi eri a ke ke vie wekhi asha o ke ya ke to obo, irari khi emini edio e she dose.”§

⁵ Oni o shito oni ukpekhomhi oghie oo li, “Ghe khe, Mhi ri emhikpa a mele enegbo-a!” Igho oo, “Keke emhi enana shi eke irari khi ingmemhi ni a ri egbe e da ni e khi igesikia e khi.”

⁶ Oo mhe, “A she li oli. Mhemhe mhi Aafa ali Omega, mhemhe mhi khi igbaekele ni mhi khi ozukhomhi. Oni okiame oo gbe, mhi ya rote oke ni oo chocho ame, ni o ri agbo a na obo na li da afue.*

⁷ Oni o da mu o le ne, o ya mholi ikhivose ona, ni, Mhemhe mhi ya khi Eshinegba oyoli, loli o khi omimhe.†

* **21:1** Li ze Aza 65.17; 66.22; 2 iPit 3.13 † **21:2** Li ze Aza 52.1; 61.10; Iro 3.12 ‡ **21:3** Li ze Ezik 37.27; iLev 26.11,12 § **21:4** Li ze Aza 25.8; 35.10; 65.19 * **21:6** Li ze Aza 55.1 † **21:7** Li ze 2 iSam 7.14; Iwolo 89.26-27

⁸ Ama egbo ni e khi enulishi ali eni ɛa ya lama miesuo, ena angeli ichimhi ali egbugbeli, ali ena itsebo eni e mu imhese ogbho ali eni ega ikhumhi, ali e lo egbholi nya, okiemhi oyewe o ya khi erali ilimhi iriere ni ofulu la to kua yala. Onana khi eghuli onuzi-eva.”

⁹ Ageni oghuo eni oshilua ni o mholi italabi ishilua ni e vọ anasemhe ishilua ni e kpe ukhokho, o bhale ya lie mhe, “Bhale, mhi ya ri oni omueshi onogbo khase, ni o khi ughue oni Omi Osumha.”

¹⁰ Elemhi oni ayemhe, oni ageni o tsua mhe nga ukhomhi ute oniemhi ni o yagha, o remhe khase oni Eoli-No-pfuase ikhi iJerusalemu, khi o rote idane te obọ oyi Eshinegba a tiemhile.‡

¹¹ O ri ufumhi oyi Eshinegba ge nyanyanya. Ugemhi oyoli o li abi echeli ni o somhi otse ni a lu iJasipa ni o li abi ughegbe.

¹² O mholi ukpokpomhi ugbe ni o yagha ni o mholi ode inuekpe igbeva. Eni ode inuekpe, igeni ogbava e la o. Eni ode inuekpe igbeva ena a keke eva eyi edeli igbeva eyi iZireni shi o.

¹³ Ode inuekpe esese e la obọ-ugbe enenene oyi oni ugbe. Ese e la ukiekie obini ovo o te e ngale oyoli, ese e la ukiekie obita, ese e la ukiekie ogobo, ese e li la ukiekie obini ovo o te e lo eko.§

¹⁴ Oni ugbe ni o gashe oni eoli o mholi echegbe igbeva. Eni echegbe igbeva ena, a keke eva eyi ighiusomhi na keke ogbava eyi oni Omi Osumha shi o.

¹⁵ Oni o nu mhe e ngme, o mholi ukpokpo ni a roo mhese emhi ni o khi igolu ni o roo ya mhese oni

‡ 21:10 Li ze Ezik 40.2 § 21:13 Li ze Ezik 48.30-35

ẹoli ali eni ode inuekpẹ ali igbe eyọli.*

16 Oni ẹoli o zẹ abọ igbe ene, ni iyagha ali inuata ali uemhi eyọli e li abizize. O mhẹse oni ẹoli, o ya khi ikuku emhi ẹa la imali agbẹlẹ ali egbhueshe ashi ishe (1,500), unuemhi ali uemhi eyi eni abọ igbe ali iyagha eyọli e khi abizize.

17 Oni agẹni o li mhẹse ugbe oyọli, e ya khi ete-awe egbhuegbe. Abi awa liẹ mhẹse eke.

18 Ugbe oyọli, eche ijasipa a ro ma li, oni ẹoli o khi egbegbi igolu ni a te ẹ me eke abi ughegbe.

19 Irogbekẹ oyi igbe ni a ma gasẹ oni ẹoli e ya khi eche ni e ghalẹ ododa. Onodode o khi ijasipa, onuzi-eva o khi isafaya, onuzi-ese o khi ikalisedoni, onuzi-ene o khi emeradi,

20 onuzi-ishe o khi isadonizi, onuzi-esesa o khi ikaneliani, onuzi-ishilua o khi ikirisolati, onuzi-elele o khi iberili, onuzi-itili o khi itopazi, onuzi-igbe o khi ikirisopirazi, onuzi-igbaghuo o khi ijasiti, onuzi-igbeva o khi ametisiti.

21 Eni ode inuekpẹ igbeva e ya khi ifefe. Ode unuekpẹ ogbogbo a ri ufefe oyọli riele ọli. Ode agbala ni o la oni ẹoli, egbegbi igolu ni a te ẹ me eke abi ughegbe a ro ku ọli.†

22 Mhi aa me Owa ugamhi okhoghuo oni ẹoli, irari khi Eshinẹgba Onomhue Nofunẹ nya ali Oni Omi Osumha wewe e khi Owa Ugamhi ni e la agho.

23 Oni ẹoli ọa ke mholi emini o ri ugemhi oyi ovo wekhi oyi uki ya li. Irari khi ugemhi oyi Eshinẹgba loli o khi akpa ni o la agho, oni Omi Osumha o khi akpa ni o la agho.‡

* 21:15 Li zẹ Ezik 40.3 † 21:21 Li zẹ Aza 54.11-12 ‡ 21:23 Li zẹ Aza 60.19-20

24 Egbọ na agbọ nya e ya ri oni ákpá ke kia, ighie ni e la agbọ e ya tsua eṣfue eyewe bhale agho. §

25 Ogbọ ọa ya tigbe khukhu ode inuẹkpẹ ni e lo oni ẹoli le ghue, itobọ khi ogbọ ọa ya me ẹliyose agho.

26 A ya tsua eṣfue ali ufumhi eyi ishishi lo oni ẹoli le.*

27 Ama, emini e ri ichimhi ẹ mu ọa ya tigbe lo agho le, wekhi ogbọ ni ọọ gbe ikanya omama ali ni ọ rieḷe emhi egbhue, se khi egbọ ni eva oyewe o la ebe ni a keke eva oyi eni e ya mholi agbọ na agbọagbọ shi oyi oni Omi Osumha. †

22

Oke Ame Agbo

1 Igho ọ ri oke ame ni o ri agbọ ọ na ogbọ khasẹ mhe, oke ni o pfuase abi ughegbe, ni o rote ukpekhomhi Eghiele oyi Eshinegba ali oyi Omi Osumha tu u lasele.*

2 Oni oke o rote iteva oyi oni ode agbala ni o la oni ẹoli. Ukiekie eve-eva oyi oni oke, ọọra ni o ri agbọ ọ na ogbọ e migha, ni o mo idumhi igbeva ododa, ni ọọ mo idumhi uki kpa. Ebe oyi oni ọọra a ro ri ishishi ee ze. †

3 Emhikhoghwo ni Eshinegba ọ pfi unu na ọa ke ya la agho. Ama ukpekhomhi oghie oyi Eshinegba ali oyi Omi Osumha oyoli e ya la agho, eni ee ga eyoli e ya ke ga. ‡

4 E ya me alo eyoli, ali eva oyoli o la we alukpo.

§ 21:24 Li ze Aza 60.3 * 21:26 Li ze Aza 60.11 † 21:27 Li ze Aza 52.1; Ezik 44.9 * 22:1 Li ze Ezik 47.1; iZaka 14.8 † 22:2 Li ze Igbae 2.9; Ezik 47.12 ‡ 22:3 Li ze iZaka 14.11

⁵ Èliyoṣẹ ọa ke ya laọ. Ea mhọli emini e ri ugẹmhi oyi ákpá ali ugẹmhi oyi ovọ ya li, irari khi Èshinẹgba Onomhufe lólighuo ọ ya khi ákpá oyẹwe, e ya ke mhẹṣe abi ighie agbọagbọ. §

⁶ Oni aḡeni ọọ mhẹ, “Eni ingmemhi enana, eni a ri egbe ẹ da e khi, e gbo khi igesikia. Èshinẹgba Onomhufe ni ọ ri ayẹmhẹ oyọli na emekeḡuele, lọli ọ ghie aḡeni oyọli ọ ka rọkhasẹ eni ẹẹ ga eyọli, emini a ya mẹ ni ọa ke ya tẹṣe.”

Ijesu ọ ya bhale

⁷ “A ghe ii, mhi keḡe ya bhale! Ikhivọṣẹ o khi na ọgbọ ni o ri ingmemhi imeḡuele ni e la ebe onana gbe akanya.”

⁸ Mhẹmhẹ iJoni mhi suọ, ni mhi gbo mẹ emhi enana. Abi mhi rọ suọ, ni mhi rọ gbo mẹ na, mhi de ya wugha oni aḡeni ni ọ ri eni emhi enana khasẹ mhẹ awe ni mhi ga li.

⁹ Ama ọ gueye mhẹ, “Khi li ighọ, oni ọọ ga nabi yeye ali onabi inyọghuo ẹ emekeḡuele, ali eni e ri ingme ni a keḡe shi ebe onana gbe akanya mhi li khi. Ga Èshinẹgba!”

¹⁰ Ọọ mhẹ, “Khi khukhu ingmemhi imeḡuele ni e la ebe ona, irari khi oni eḡheḡhe ọ she ti ramhi.

¹¹ Oni ọọ riẹḡe onobe, ọ ke riẹḡe tṣeẹ, oni ọọ gbe ikanya ichimhi, ọ ke gbe tṣeẹ, oni ọ guẹ a ngeli, ọ guẹ ke ngeli tṣeẹ, oni ọ pfuase, ọ pfuase ke ḡe tṣeẹ.”*

¹² “A ghe ii, mhi keḡe ya bhale, mhi tsua ifata eyẹmhẹ, mhi ya fali ọgbọgbọ ota abi ọ li gbe. †

§ 22:5 Li zẹ Aza 60.19; iDan 7.18 * 22:11 Li zẹ iDan 12.10

† 22:12 Li zẹ Aza 40.10; 62.11; Iwolo 28.4; ijere 17.10

13 Mhemhe mhi khi Aafa ali Omega, Mhemhe mhi khi oni Odode ali Okpukhokho, ni mhi khi Igbaekele ali Ukpese.‡

14 “Ikhivose o khi na egbo ni e pfuwe iwulu eyewe-a pfuase, ni e mhue obo shi oora ni o ri agbo a na ogo, ali ini e ba me asha rote ode unuekpe ni o lo oni eoli, le lole. §

15 Ewa e la oolase oni eoli, ali eni e mu imhese ogbo ali eni e li itsebo ali egbo ugbeli ali eni e ga ikhumhi ali eni e da nono ingme egbholi, ni e di egbo.

16 “Mhemhe iJesu mhi she ghie ageni oyemhe o ri otsele ona ghi e eni igbaa nya eyi eni e mie iJesu iKirisiti suo. Mhemhe mhi khi Umhili ali Omiomi iDefidi, Mhemhe mhi khi Ukpeta ni o ge eluzogbe.”*

17 Oni Ayemhe ali omueshi onogbo oo li, “Bhale!” Oni o suo ona o li lie, “Bhale!” Oni okiamere oo gbe o bhale, ali onini o ghole o bhale ka da amere ni o ri agbo a na ogo, afue afue. †

18 Mhi tse agua ye ogo ni o suo imeguele ni e la ebe ona. Ini ogbokhoghuo o khi ma o, Eshinegba o ya khi anasemhe ni a keke shi ebe ona ma li agbo.

19 Ini ogbokhoghuo o rote ingmemhi imeguele ni a keke shi ebe onana rue pfi-a, Eshinegba o ya mie oli okemhi ni o mholi shi oora ni o ri agbo a na ogo, ali ashini a khi na li shi eoli ni o pfuase, ni a ngme ingme oyoli shi oni ebe onana.‡

‡ 22:13 Li ze Iro 1.8,17; 2.8; Aza 44.6; 48.12 § 22:14 Li ze Igbae 2.9; 3.22 * 22:16 Li ze Aza 11.1,10 † 22:17 Li ze Aza 55.1 ‡ 22:19 Li ze iDeut 4.2; 12.32

²⁰ Ọni ọ pfi ọtsele shi ebe onana, ọọ, “Igesikia lo, mhi kele ya bhale.”

Atse. IJesu Ọnọmhuẹ bhale.

²¹ Okhale oyi iJesu Ọnọmhuẹ o ka nu eni miesuọ nya la, Atse.

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

03be06b0-68fd-500b-b9a9-6bca4b63979a